



# **KEPERIBADIAN DAN KEBIJAKSANAAN IMAM AS-SHAFI'I**

**TUAN GURU SYEIKH MUHAMMAD NURUDDIN  
MARBU AL-BANJARI AL-MAKKI**

## SEKILAS MANAQIB IMAM SYAFI'E

### 1. NASAB

Beliau adalah Abu Abdullah Muhammad bin Idris bin Al-Abbas bin Uthman bin Syafi'e bin Al-Saib bin Ubaid bin Abdul Yazid bin Hasyim bin Abdul Mutthalib bin Abdul Manaf bin Qusai Al-Quraisyi Al-Mutthalibi Al-Syafi'e. Pertemuan nasab beliau dengan Rasulullah S.A.W adalah pada datuknya yang ke-empat iaitu Abdul Manaf.<sup>1</sup>

Syafi'e bin Al-Saib termasuk daripada kalangan sahabat muda. KEPADANYA di nisbahkan Imam Syafi'e, iaitu datuknya yang keempat Al-Saib bin Ubaid yang tertawan pada perang Badar. Beliau adalah pemegang bendera Bani Hasyim, yang tertawan bersama tawanan lainnya dan kemudian beliau menebus dirinya sendiri lalu masuk Islam.

Ibu beliau bernama Fatimah bin Ubaidullah bin Hassan bin Hussin bin Ali bin Abi Thalib Karamallahu Wajhah berasal daripada Kabilah Azdi.<sup>2</sup>

---

### ULASAN

<sup>1</sup> 1. Imam Nawawi menyatakan bahawa berdasarkan beberapa fakta bukti yang kukuh, ahli sejarah sepakat berpendapat bahawa Imam Syafi'e adalah kaum Quraish berketurunan Muttalib. – Tahzib Al-Asma' Wa Al-Lughah.

2. Imam Al-Razi menerangkan bahawa Imam Al-Jurjani, seorang ulama' besar Hanafi menyatakan, ada sebilangan ulama' Maliki menolak salasilah

---

keturunan Imam Syafi'e yang berhubung kait dengan keturunan Rasulullah S.A.W. Bukan itu saja tetapi mereka sebaliknya pula cuba membuktikan bahawa Imam Syafi'e adalah dari keturunan hamba sahaya kepada Abu Lahab laknatullah Alaihi. Imam Al-Razi telah menolak pendapat ini dengan hujahnya iaitu:-

- i. Imam Syafi'e dengan tegas berbangga dengan keturunan yang mulia ini.
- ii. Majoriti ulama' sejarah sepakat berpendapat bahawa beliau adalah daripada Qabilah Quraish, sebagaimana ianya ditegaskan sendiri oleh Imam Bukhari dalam kitabnya, Al-Tarikh Al-Kabir dan muridnya Imam Muslim. - Manaqib Imam Al-Syafi'e.

## ULASAN

- <sup>2</sup> 1. Terdapat dua pendapat ahli sejarah tentang keturunan Imam Syafi'e sebelah pihak ibu:-
  - i. Yang terlebih sahih dan masyhur sebagaimana yang diisytiharkan sendiri oleh Imam Syafi'e ialah ibunya adalah dari keturunan qabilah Azdi yang lebih dikenali dengan panggilan Ummu Habibah Al-Azdiah.
  - ii. Ibunya adalah Fatimah binti Abdullah bin Husain bin Ali R.A. Pendapat ini telah disokong oleh Imam Al-Subki dalam kitabnya Tabaqaat Al-Syafi'iah Al-Kubra.

## 2. KELAHIRAN

Beliau dilahirkan pada tahun 150 Hijrah, iaitu tahun di mana wafatnya Imam Abu Hanifah. Menurut sebahagian pendapat ulama', wafatnya Imam Abu Hanifah bertepatan dengan hari lahirnya Imam Syafi'e, tetapi tidak ada riwayat yang kuat mengenainya.<sup>3</sup> Yang masyhur menurut pendapat kebanyakan para ulama, beliau dilahirkan di Kota Ghaza, sedangkan menurut sebahagian ulama pula, di Kota Asqalan. Kedua-dua tempat tersebut terletak lebih kurang 80km dari "Baitul Maqdis" yang merupakan bumi suci dan diberkati Allah swt.<sup>4</sup>

- 
2. Diriwayatkan bahawa ketika sedang mengandung, ibu Imam Syafi'e bermimpi melihat bintang Musytari (Jupiter) keluar dari rahimnya lalu meluncur ke angkasa, kemudian jatuh di bumi Mesir. Dari sana tiba-tiba bumi menjadi terang dan bersinar-sinar kesan daripada percikan cahaya yang memancar dari bumi Mesir. Apabila dia menceritakan mimpinya kepada seorang alim di kampungnya, orang itu memberitahunya bahawa InsyaAllah dia akan melahirkan seorang anak yang ilmunya kelak akan memenuhi muka bumi. – Al-Bidayah Wa Al-Nihayah Li Ibnu Kathir.

## ULASAN

- <sup>3</sup> 1. Para ahli sejarah sepakat menyatakan bahawa Imam Syafi'e dilahirkan pada tahun 150 Hijrah di zaman

---

Abu Ja'afar Al-Mansur menjadi khalifah kedua Bani Abbas di Baghdad iaitu bersamaan dengan tahun kewafatan Imam Abu Hanifah - Tawalli Al-Ta'sis Li Al-Hafiz Ibni Hajar dan Manaqib Al-Syafi'e li Al-Baihaqi.

2. Imam Nawawi dalam kitabnya Tahzib Al-Asma' Wa Al-Lughah, Imam Yaquut Al-Ruumi dalam kitabnya Mu'jam Al-'Udaba' dan Imam Al-Razi dalam Manaqib Imam Al-Syafi'e menyatakan bahawa Imam Syafi'e dilahirkan pada hari kewafatan Imam Abu Hanifah.
3. Imam Al-Imam Al-Rabi' bin Sulaiman iaitu salah seorang daripada murid Imam Syafi'e menyatakan bahawa Imam Syafi'e dilahirkan pada hari kematian Imam Abu Hanifah tetapi Imam Baihaqi kemudian mengulas kenyataan Imam Al-Imam Al-Rabi' dengan katanya: "Saya belum pernah menemui mana-mana riwayat yang mengaitkan kelahiran Imam Syafi'e berkebetulan dengan hari kewafatan Imam Abu Hanifah." – Manaqib Al-Syafie Li Al-Baihaqi.

## ULASAN

- <sup>4</sup> 1. Berkata Al-Hafiz Ibnu Hajar: "Setelah dibuat kajian dan perbandingan di antara beberapa riwayat dan pendapat ulama' mengenai tempat kelahiran Imam

---

Syafi'e, kesimpulannya ialah Beliau dilahirkan di kota Ghaza yang terletak di dalam daerah 'Askalan, Palestin- Tawalli Al-Ta'sis Li Al-Hafiz Ibni Hajar.

2. Al-Syeikh Muhammad Al-Ghazali di dalam kitabnya Fiqh Al-Sirah, menyatakan di antara hikmah Allah S.W.T. melahirkan Rasulullah S.A.W. dalam keadaan yatim dan kemudian setelah berumur enam tahun diwafatkan pula ibu baginda, bertujuan untuk menguatkan hati Rasulullah S.A.W dan supaya tertanam sifat kecekalan di dalam hatinya semenjak kecil lagi. Dengan ini, Baginda akan mampu menghadapi segala bentuk ujian, cabaran dan dugaan di kemudian hari nanti iaitu ketika dan setelah baginda ditabalkan menjadi Rasul.

3. Demikianlah juga hikmah yang dapat disimpulkan terhadap Imam Syafi'e yang dilahirkan dalam keadaan yatim lagi miskin. Kisah kehidupan Rasulullah S.A.W. dan Imam Syafi'e di masa kecil yang penuh dengan kesusahan dan penderitaan patut menjadi renungan dan pendoman yang besar kepada ibubapa. Kemiskinan bukanlah faktor penghalang utama dalam memberi pendidikan ilmu kepada anak-anak bahkan kata Imam Malik sebagaimana yang dinukilkan oleh Imam Nawawi dalam Sarh Al-Muhazzab: "Hanya orang miskin dan yang sanggup menghadapi kesusahan pada masa belajar sahaja, akan mendapat ilmu pengetahuan"

### 3. KEHIDUPAN SEMASA KECIL

Beliau dibawa berhijrah ke Makkah ketika berusia dua tahun dan dibesarkan dalam keadaan yatim di bawah pemeliharaan ibunya dengan keadaan hidup yang serba kekurangan.<sup>5</sup>

Imam Syafi'e berkata: "Dulu saya dalam keadaan yatim di bawah penjagaan ibu, kemudian saya dihantar ke sekolah sedangkan ibu pada waktu itu tidak mempunyai wang untuk membayar yuran persekolahan. Tetapi Alhamdulillah, guru mengizinkan saya belajar tanpa perlu membayar yuran persekolahan bahkan saya dibenarkan menggantikan tempatnya ketika mana beliau uzur."<sup>6</sup>

Setelah saya mengkhatamkan hafalan Al-Quran,<sup>7</sup> saya pun memasuki halaqah pengajian di masjid. Di sana, saya banyak belajar dan menghafal ilmu Hadis dan segala permasalahan yang berkaitan dengannya, di samping bergaul dan berguru dengan para ulama".

---

## ULASAN

<sup>5</sup> Satu perkara yang tidak harus dilupakan oleh pembaca bahawa ibu Imam Syafi'e adalah seorang yang bijaksana dan berperanan penting dalam memberi tunjuk ajar, bimbingan dan dalam membentuk peribadi Imam Syafi'e. Beliau juga seorang yang peka dengan situasi semasa dan cepat bertindak iaitu dengan segera berpindah ke tempat tumpah darah datuk neneknya, Kota Makkah. Penghijrahan ini bertujuan untuk memberi ilmu pengetahuan secukupnya kepada anaknya sehingga Imam Syafi'e menjadi seorang ulama' yang terbilang

---

sebagaimana kata beliau ketika menceritakan perihal ibunya :

خافت أُمي على الضيعة وقالت الحق بأهلك فتكون مثلهم  
فأني اخاف ان يغلب على نسبك فجهزني أُمي الى مكة

Maksudnya: “Ibuku merasa bimbang terhadap masa depan hidupku, lalu ia mengingatkan diriku dengan katanya: “Berhijrahlah ke tempat asal datuk nenekmu supaya kamu akan menjadi mulia dan terbilang seperti mereka kerana sesungguhnya aku takut kalau-kalau keturunanmu dikhianati”. Setelah itu ibu pun segera membuat persiapan untuk berhijrah ke kota Mekah.”

– Sirah Imam Al-Syafi’e oleh Dr. Wan Abdul Qadir bin Wan Ahmad.

## ULASAN

- <sup>6</sup> 1. Kata Imam Syafi’e lagi: “Dengan sebab kemiskinan, ibu saya tidak mampu menyediakan peralatan persekolahan untuk saya. Justeru itu saya mencari tulang, belulang, daun tamar yang kering dan pelepahnya untuk saya catat dan simpankan segala ilmu yang di pelajari”. *Manaqib Al-Syafi’e Li Al-Baihaqi*.
2. Beliau tidak segan silu pergi ke majlis-majlis umum atau ke pejabat kerajaan di mana terdapat lembaran-lembaran kertas yang sudah dibuang ke dalam bakul sampah. Beliau akan meminta supaya kertas-kertas

---

tersebut diberikan kepadanya untuk tujuan penulisan. - Ustaz Mustafa Suhaimi- IMAM ASY-SYAFI'E.

## ULASAN

- <sup>7</sup> Ketika Imam Syafi'e berusia tujuh tahun beliau telahpun berjaya menghafal sebuah Al-Quran iaitu dengan berguru kepada Imam Ismail bin Qusthantiin yang merupakan salah seorang dari beberapa orang gurunya ketika menimba ilmu di Mekah. - Al-Bidayah Wa Al-Nihayah Li Ibni Kathir.

#### 4. PENDIDIKAN AWAL

Pada permulaannya, Imam Syafi'e mendalami syair dan sastera Arab<sup>8</sup> dan setelah itu baru beralih ke ilmu Feqah.

Imam Syafi'e berkata: "Suatu hari saya telah pergi belajar nahu dan sastera Arab, tiba-tiba saya berjumpa dengan Muslim bin Khalid Al-Zinji,<sup>9</sup> lalu beliau menegur saya dengan katanya: "Hai pemuda, kamu berasal dari mana?". Saya menjawab: "Dari Makkah." Tanyanya lagi: "Di kampung mana kamu tinggal di Makkah?". Saya menjawab: "Dari kampung Syi'bu Al-Khaif". Tanyanya lagi: "Dari kabilah mana?". "Dari keturunan Abdul Manaf.", jawab saya. Katanya: "Bakhin-Bakhin (bagus-bagus), sesungguhnya Allah telah memuliakan kamu di dunia dan akhirat. Tidakkah kamu suka meluaskan pengetahuan dalam ilmu Feqah, kerana itu lebih baik bagimu".

Pada waktu malamnya, saya terus memikirkan nasihatnya tadi sehingga saya tertidur dan bermimpi didatangi seseorang. Dia berkata kepada saya: "Ya Abu Abdillah, apakah kamu menganggap bahawa sastera itu sesuatu yang mampu memberi kemuliaan". Saya menjawab: "Ya". Lalu dia menasihati saya dengan katanya: "Ketahui olehmu, jika sekiranya kamu sudah tua nanti, sesungguhnya ilmu Feqahlah yang akan memberi kemuliaan kepadamu". Lalu saya pun menerima saranannya.

---

#### ULASAN

- <sup>8</sup> 1. Dengan memiliki wawasan yang begitu jauh dalam diri, Imam Syafi'e sedar bahawa untuk memahami Al-Quran berserta dengan rahsianya tidak mungkin akan tercapai melainkan dengan menguasai dan mendalami sepenuhnya bahasa Arab. Oleh itu, sebagai persediaan ke arah itu beliau telah tinggal

---

bersama qabilah Huzail yang terkenal dengan keelokan bahasa mereka. Beliau hidup bergaul dengan mereka, menghafaz syair-syair mereka dan mempelajari tatabahasa Arab yang memakan masa lebih kurang sepuluh tahun, mengikut setengah riwayat dan ada juga riwayat yang mengatakan dua puluh tahun sehingga jadilah beliau sebagai seorang ahli sastera Arab dan pakar dalam bahasanya. – Sirah Imam Syafi'e oleh Dr. Wan Abdul Qadir bin Wan Ismail.

2. Menurut setengah riwayat, beliau berterusan mempelajari bahasa Arab di samping mempelajari ilmu Feqah, ilmu Hadis, ilmu Al-Quran dan lain-lain ilmu agama. Beliau menghabiskan masa kira-kira 20 tahun untuk mendalami bahasa itu. Ibnu Hisyam, seorang pakar bahasa Arab menegaskan bahawa Imam Syafi'e adalah bukti atau contoh kehebatan bahasa Arab pada masanya. Ibnu Hisyam sendiri dan ahli-ahli bahasa Arab yang lain pernah datang kepada Imam Syafi'e untuk bertanyakan sesuatu mengenai bahasa Arab. Seorang ahli bahasa Arab, Yunus bin Abu A'la berkata: "Apabila Imam Syafi'e bercakap tentang ilmu Feqah, beliaulah orang yang lebih mengetahui ilmu Feqah daripada orang lain dan apabila beliau bercakap mengenai bahasa, beliau jugalah orang yang lebih mengetahui ilmu bahasa daripada orang lain". Oleh kerana

---

bahasa yang diucapkan oleh beliau untuk menyampaikan kuliahnya adalah bahasa yang baik, maka ramai juga orang yang bukan ahli dalam ilmu Feqah, Hadis atau tafsir Al-Quran datang ke majlis ilmunya setiap hari. Seorang ahli sastera Arab, Imam Al-Karabisi berkata : "Majlis pelajaran Imam Syafi'e dihadiri oleh ramai ahli bahasa dan para penyair yang terkemuka pada masanya." Al-Hasan bin Al-Za'farani pernah melihat beberapa orang ahli sastera duduk di dalam majlis ilmu Imam Syafi'e lalu beliau bertanya kepada salah seorang daripada mereka : "Kamu bukan ahli ilmu agama, kenapa kamu datang bersama kami?" Mereka menjawab: "Kami ingin mendengar bahasa Imam Syafi'e". Dikatakan bahawa beberapa orang ahli bahasa cuba mencari kesilapan dalam pertuturan atau tulisan Imam Syafi'e tetapi mereka tidak berjaya. Imam Al-Imam Al-Rabi' telah menulis panjang lebar mengenai kehalusan dan ketinggian bahasa yang digunakan oleh Imam Syafi'e. beliau menutup tulisannya dengan ayat yang berbunyi: "Lidah Imam Syafi'e bagi saya lebih besar daripada kitab-kitabnya". Imam Syafi'e sangat menghargai bahasa Arab. Beliau pernah berkata bahawa mempelajari bahasa Arab adalah wajib bagi setiap orang Islam sama ada orang Arab atau bukan Arab. Beliau menulis pendapatnya ini dalam kitabnya, Al-Risalah. Katanya lagi: "Bahasa Arab hendaklah didahulukan daripada bahasa lain kerana

---

ia adalah bahasa Al-Quran dan bahasa yang digunakan oleh Rasulullah S.A.W.” – IMAM SYAFIE oleh Mustafa Suhaimi

## ULASAN

<sup>9</sup> Di antara guru-guru Imam Syafi'e yang masyhur di Makkah sebagaimana yang telah disebut oleh Imam Baihaqi ialah:-

1. Imam Sufian bin 'Uyainah bin 'Imran Al-Hilali
2. Imam Abdul Rahman bin Abi Bakar bin Abdullah bin Abi Mulaikah
3. Imam Abdullah bin Al-Mu'mil Al-Makhzumi Al-Maki
4. Imam Abdul Rahman bin Hasan bin Al-Qasim Al-Azraqi Al-Ghassani
5. Imam Ibrahim bin Abdul Aziz bin Abdul Malik bin Abi Mahzurah
6. Imam Muslim bin Khalid Al-Zinji
7. Imam 'Uthman bin Abi Al-Kitab Al-Khuza'i Al-Maki
8. Imam Muhammad bin Ali bin Syafi'e
9. Imam Muhammad bin Abi Al-Abbas bin 'Uthman bin Shafi'
10. Imam Ismail bin Abdullah bin Qusthathiin Al-Muqri
11. Imam Abdullah bin Al-Harith bin Abdul Malik Al-Makhzumi

## 5. *MIMPI BERJUMPA RASULULLAH S.A.W.*

Imam Syafi'e berkata: "Saya pernah bermimpi berjumpa dengan Rasulullah S.A.W. sebelum saya baligh lagi. Baginda telah bersabda kepada saya: "Wahai anak!". Saya jawab: "Labbaika ya Rasulullah!". Tanya baginda: "Dari marra asal keturunanmu?". Saya menjawab: "Dari keturunanMu." Baginda menambah: "Sila dekatkan diri kamu ke sini." Kemudian baginda mengambil air liurNya dan saya pun membuka mulut saya. Lalu baginda menyapukan air liurNya tadi di lidah, mulut dan kedua bibir saya, lantas baginda bersabda: "Pergilah kamu, semoga Allah S.W.T. memberkatimu". Setelah itu saya tidak pernah lagi terkeliru dalam membaca dan menghafal Hadis mahupun syair atau sastera."

- 
12. Imam Hammad bin Tharif
  13. Imam Fudhail bin 'Iyadh
  14. Imam Abu Safuan Abdullah bin Said bin Abdul Malik bin Maruan bin Al-Hakam
  15. Imam Muhammad bin 'Uthman bin Safuan Al-Juhmi
  16. Imam Sa'id bin Salim Al-Qudah Al-Maki
  17. Imam Daud bin Abdul Rahman Al-'Atthar
  18. Imam Abdul Majid bin Abdul Aziz bin Abi Rawwad
  19. Imam Yahya bin Sulaim Al-Thaaifi- Manaqib Al-Syafi'e Li Al-Baihaqi.

## 6. *DAYA INGATAN*

Imam Syafi'e telah menghafal Al-Quran semenjak berumur tujuh tahun lagi.<sup>10</sup> Beliau juga telah menghafal kitab Muwattha Imam Malik ketika berumur 10 tahun dan sudah diizinkan berfatwa ketika berumur 15 tahun.<sup>11</sup>

Kata Imam Al-Rabi': "Saya dengar suatu hari Imam Syafi'e bercerita dengan katanya: "Sewaktu saya mula-mula belajar di sekolah, saya mendengar guru mengimlakan ayat kepada para pelajar dan saya pula telah menghafal ayat tersebut. Setelah guru selesai membacakan kesemuanya, saya sudah berjaya menghafal kesemua yang diimlakan. Justeru itu, guru telah berkata kepada saya: "Tidak halal bagiku mengambil sesuatu darimu."

---

### ULASAN

<sup>10</sup> Imam Syafi'e mempunyai suara yang lunak ketika membaca Al-Quran, di samping mempunyai kemahiran dalam ilmu tajwid dan tafsir Al-Quran. Di Makkah, ketika beliau masih berumur belasan tahun, ramai orang mengenali beliau sebagai seorang qari Al-Quran yang baik. Sebab itu apabila mereka ingin menikmati bacaan Al-Quran secara khusyuk, mereka pun berkumpul dan memanggil Imam Syafi'e untuk membacanya.- *IMAM ASY-SYAFI'E* oleh Mustafa Suhaimi.

### ULASAN

<sup>11</sup> Di Makkah, ketika beliau masih belajar dengan mufti Makkah, Muslim bin Khalid Al-Zinji, telah timbul satu masalah yang dikemukakan dalam majlis ilmu

---

gurunya itu. Imam Muslim kurang yakin jawapan yang tepat kepada persoalan itu, lalu beliau pun berpaling kepada Imam Syafi'e dan berkata: "Berilah fatwa kepada orang yang bertanya, kerana demi sesungguhnya engkau telah berhak memberi fatwa". Imam Syafi'e pun lantas mengemukakan pendapatnya dan gurunya pun mengakui kebenaran pendapatnya.

## 7. PENGEMBARAAN KE KOTA MADINAH

Semasa Imam Syafi'e berumur 13 tahun, beliau telah mengembara dari Makkah ke Kota Madinah untuk menimba ilmu pengetahuan dari Abu Abdillah, Imam Malik bin Anas. Beliau membawa bersama-samanya sepucuk surat dari Gabenor Makkah untuk disampaikan kepada Gabenor Madinah dan Imam Malik bin Anas.<sup>12</sup>

Setibanya di sana, Imam Malik telah mendengar cerita mengenai kedatangan Imam Syafi'e. Setelah berjumpa dengannya, Imam Malik pun bertanya: "Siapa namamu?" Imam Syafi'e menjawab: "Muhammad". Kemudian Imam Malik berkata: "Wahai Muhammad, bertaqwalah kamu kepada Allah dan jauhilah perbuatan maksiat, kerana dengan ini, kamu akan dikurniakan sesuatu yang istimewa dari Allah S.W.T." Dalam riwayat lain, Imam Malik berkata kepada Imam Syafi'e: "Sesungguhnya Allah S.W.T telah memberikan cahaya kepadamu. Maka janganlah kamu padamkan cahaya tersebut dengan kemaksiatan." Imam Syafi'e menjawab: "Ya, itu merupakan kemuliaan bagiku." Imam Malik berkata: "Apabila esok kamu datang, maka akan datang juga orang yang akan membacakan kepadamu kitab "Muwattha". Imam Syafi'e menjawab: "Sesungguhnya saya telah menghafalnya dengan baik." Maka pada keesokan harinya, saya pun datang dan memulakan pengajian dengan Imam Malik. Setiap kali saya membaca di depan beliau, saya merasa segan. Terlintas dalam hati saya untuk berhenti membacanya, namun beliau meyeruh saya untuk meneruskannya, kerana beliau merasa kagum dengan bacaan saya dan beliau berkata: "Wahai pemuda teruskan pembacaanmu". Saya telah membaca kitab Muwattha sehingga saya dapat menyelesaikan pembacaannya hanya dalam beberapa hari sahaja.<sup>13</sup>

Seterusnya Imam Syafi'e pun menetap di Madinah, di mana pada ketika itu beliau baru berumur 13 tahun.<sup>14</sup> Beliau berguru dengan Imam Malik sehingga beliau wafat.

---

## ULASAN

<sup>12</sup> Dicatatkan di dalam kitab *Bustan Al-'Arifiin*, diriwayatkan bahawa suatu hari Imam Syafi'e telah kembali ke rumahnya dengan penuh kegembiraan setelah mendapat surat dari Gabenor Makkah untuk memperkenalkan beliau kepada Imam Malik. Setelah sampai di rumahnya, oleh kerana beliau terlalu gembira dan terlalu berkeinginan untuk memberitahu ibunya tentang berita tersebut, beliau telah mengetuk pintu dengan agak kuat iaitu melebihi dari kebiasaannya. Ibunya yang berada di dalam rumah tidak dapat mengagak siapakah yang mengetuk pintu dari luar sehingga ibunya bertanya: "Siapa yang mengetuk pintu itu?". Jawab Imam Syafi'e: "Saya, Syafi'e". Setelah mengetahui bahawa orang yang mengetuk pintu dengan kuat itu adalah Syafi'e lalu tanpa membuka pintu, ibunya pun berkata: "Kalau itulah Syafi'e, pergilah lagi dan janganlah engkau pulang menemui daku sehingga engkau telah belajar dengan sempurna ilmu mengenai adab sopan yang baik dan budi pekerti yang mulia". Sindiran tajam dari ibunya itu sungguh menusuk hati kecilnya. Sejak itu beliau berazam akan terus menuntut ilmu dan tidak akan pulang sehingga pengetahuannya sempurna.

Setelah itu, tanpa masuk ke dalam rumah berjumpa ibunya, Imam Syafi'e terus pergi ke Madinah dengan

---

berbekalkan beberapa keping duit dirham sahaja. Beliau telah menumpang rombongan dagang yang hendak pergi berniaga ke Syam. Dalam perjalanan menuju ke Madinah yang memakan masa 8 hari, beliau telah sempat mengkhatamkan Al-Quran sebanyak 16 kali.

## ULASAN

- <sup>13</sup> 1. Imam Syafi'e belajar ilmu Hadis dan Fekah daripada Imam Malik dan diminta tinggal dirumahnya selama empat tahun. Sekali sekala beliau meminta izin dari gurunya untuk mengembara ke negeri lain. Tetapi kemudian beliau pulang lagi ke Madinah dan menyambung pengajiannya di majlis Imam Malik sehinggalah Imam Malik wafat - IMAM ASY-SYAFI'E oleh Ustaz Mustafa Suhaimi.
  
2. Pada Musim Haji, ramai orang dari Mesir datang ke Madinah untuk menziarahi makam Rasulullah S.A.W. Di masjid Madinah, mereka berpeluang mendengar Imam Syafi'e membaca dan kadangkadangkang menghuraikan kandungan Al-Muwatta' di majlis ilmu Imam Malik apabila diminta oleh gurunya itu. Mereka sangat tertarik mendengar penjelasan Imam Syafi'e walaupun mereka adalah alim ulama' terkenal dan menjawat jawatan tinggi agama di Mesir seperti Imam Al-Laith bin Sa'id, Imam Abdullah bin Abdul Hakam, Imam Ibnu

---

Qasim dan lain-lain lagi. Oleh itu, apabila Imam Syafi'e sampai ke Mesir untuk meluaskan pengajian dan pengalamannya, beliau diberi sambutan dan penghormatan yang besar. Begitu juga penghormatan yang diberikan oleh orang-orang di Iraq ketika beliau mula-mula sampai di sana kerana mereka pernah mendengar Imam Syafi'e menghuraikan kandungan kitab Al-Muwatta' dan memberi fatwanya sendiri dalam majlis Ilmu di Makkah dan Madinah- Ibid

## ULASAN

- <sup>141</sup>. Kata Al-Hafiz Ibnu Hajar: "Berdasarkan kepada beberapa riwayat yang kuat, menunjukkan bahawa Imam Syafi'e telah pergi ke Madinah ketika berusia 13 tahun iaitu sekitar tahun 163 hijrah. Walaupun semenjak beliau berguru dengan Imam Malik beliau banyak tinggal di Madinah tetapi beliau tetap juga berulang-alik ke Makkah dan Qabilah Huzail sehinggalah wafatnya Imam Malik pada tahun 179 Hijrah. Pada masa itu beliau baru berumur 29 tahun. Setelah itu, Imam Syafi'e pun kembali menetap di Makkah setelah memperolehi segala ilmu yang tidak ternilai harganya dari Imam Malik. Bermulalah selepas itu nama Imam Syafi'e terkenal dan masyhur dalam masyarakat sebagai seorang yang berilmu. – Tawalli Ta'sis

---

2. Walau ke mana Imam Syafi'e pergi, beliau sentiasa memuji Imam Malik dengan katanya: "Imam Malik adalah guru saya. Daripadanya saya belajar dan tidak ada seorang pun yang dapat memberi kepuasan kepada hati saya dalam pelajaran selain dari Imam Malik. Saya menjadikan dia hujah antara saya dan Allah. - IMAM AL-SYAFI'E oleh Mustafa Suhaimi.

3. Imam Baihaqi telah menyebutkan guru-guru ternama Imam Syafi'e di Madinah. Mereka ialah:-

1. Imam Malik bin Anas bin Abi 'Amir Al-Asbahi
2. Imam Ibrahim bin Sa'ad bin Ibrahim bin Abdul Rahman bin 'Auf.
3. Imam Abdul Aziz bin Muhammad Al-Darawardi
4. Imam Abu Ismail Hatim bin Ismail Al-Muzani
5. Imam Anas bin 'Iyadh bin Abdul Rahman Al-Laithi
6. Imam Muhammad bin Ismail bin Abi Fudaik
7. Imam Abdullah bin Nafi' Al-Assaa'ighi
8. Imam Ibrahim bin Muhammad bin Abi Yahya Al-Aslami
9. Imam Al-Qasim bin Abdullah bin Umar Al-Umari
10. Imam Abdul Rahman bin Zaid bin Aslam
11. Imam 'Atthaf bin Khalid Al-Makhzumi
12. Imam Muhammad bin Abdullah bin Dinar

## 8. *PENGEMBARAAN KE BAGHDAD DAN MESIR*<sup>15</sup>

Pada tahun 195 Hijrah, Imam Syafi'e tiba di Baghdad.<sup>16</sup> Beliau tinggal di sana selama lebih kurang 2 tahun. Para ulama' Baghdad telah datang berduyung-duyung untuk menjimba ilmu pengetahuan daripada beliau. Di sana beliau mengarang beberapa kitab yang seterusnya di kenali dengan "Qaul Qadiem"<sup>17</sup>. Setelah itu beliau kembali ke Makkah, kemudian datang kembali ke Baghdad pada tahun 198 Hijrah.<sup>18</sup> Selanjutnya beliau meneruskan pengembaraan ke Mesir pada tahun 199Hijrah.<sup>19</sup> Di Mesir, lahirlah karangan-karangan agung beliau seperti Al-Um, Al-Amali, Al-Kubra, Al-Imla' Al-Shagir, Mukhtasar Buaiti dan Mukhtasar Al-Muzani. Selanjutnya kitab-kitab tersebut dikenali dengan "Qaul Zadid".<sup>20</sup> Demikianlah kehidupan Imam Syafi'e yang sentiasa sibuk menyebarkan ilmu pengetahuan,<sup>21</sup> sehinggalah ke saat beliau meninggal dunia di Mesir pada bulan Rejab tahun 204 Hijrah.

- 
13. Imam Muhammad bin 'Amru bin Waqid Al-Aslami
  14. Imam Sulaiman bin Amru – Manaqib Al-Syafi'e.

## ULASAN

### <sup>15</sup> 1. **Pengembaraan Ke Yaman (Sebelum Ke Baghdad)**

Setelah kembali ke Makkah selepas sekian lama menetap di Madinah, Imam Syafi'e telah menggunakan semua masa hariannya yang terluang untuk berkhidmat kepada ilmu. Dalam

---

pada itu, beliau bercita-cita pula untuk menimba ilmu dari kalangan ulama' Yaman. Beliau pernah mendengar cerita tentang kehebatan negeri Yaman yang kaya dengan berbagai-bagai ilmu pengetahuan. Di sana juga terdapat sebilangan ulama' besar yang merupakan anak murid kepada Imam Ibnu Juraij yang wafat pada tahun 150 Hijrah. Menurut mereka yang rapat bergaul dengan Imam Syafi'e, pada permulaannya di sebabkan faktor kemiskinan, beliau terpaksa membatalkan hasratnya itu kerana tidak mampu untuk pergi ke Yaman.

Suatu ketika ada seorang lelaki dari keturunan bani Abdul Muttalib yang menjadi Gabenor di suatu wilayah di dalam negeri Yaman telah datang ke Makkah. Setelah berita tersebut diketahui oleh ibu Imam Syafi'e, ibunya lantas bergegas pergi menemui keluarga bapa saudara Imam Syafi'e sebelah ayahnya. Ibunya memohon jasa baik mereka untuk berunding dengan Gabenor tersebut agar membawa bersama-samanya Imam Syafi'e ke Yaman sekembalinya ke sana. Setelah perundingan dibuat, Gabenor bersetuju membawa bersama-samanya Imam Syafi'e ke Yaman. Ibu Imam Syafi'e telah menggadaikan rumah tempat tinggalnya dengan harga sebanyak 16 Dinar sebagai perbelanjaan beliau ke Yaman.

---

Ada Riwayat yang mengatakan bahawa ibu beliau telah ikut bersamanya ke Yaman.

Di Yaman, setelah Gabenor mengetahui keperibadian dan kepintaran Imam Syafi'e, beliau telah menawarkan jawatan tinggi dalam hal ehwal hukum syarak di negerinya.. Imam Syafi'e telah menyambut baik tawaran tersebut dan telah bekerja di suatu tempat bernama Najran.

Semasa di Yaman Imam Syafi'e telah sempat berguru dengan ulama'-ulama' berikut:-

1. Imam Hisyam bin Yusuf Al-Sana'ani
2. Imam Abu Ayub Mutharraf bin Mazin Al-Sana'ani
3. Imam Abu Hafs Amru bin Abi Salamah Al-Auza'I
4. Imam Abu Hanifah bin Simak bin Al-Fadhl
5. Imam Muhammad bin Khalid Al-Jundi
6. Imam Muhammad bin Abdul Rahman Al-Jundi
7. Imam Ayub bin Suwaid Al-Ramli
8. Imam Yahya bin Hasan Al-Tanniisi iaitu anak murid kepada Imam Al-Laith bin Sa'ad.

Semasa di Sana'a, Yaman beliau telah berkahwin dengan Hamidah bin Nafi', cucu 'Uthman bin 'Affan. Dari perkahwinan itu beliau telah mendapat tiga orang anak, seorang lelaki

---

bernama Abu 'Uthman Muhammad bin Muhammad bin Idris yang kemudiannya menjadi qadi di Halab, Syam. Dua orang lagi perempuan bernama Fatimah dan Zainab.

Oleh kerana beliau sentiasa tegas mengikut hukum syara' dan tidak teragak-agak membuktikan kesalahan dan penyelewengan yang dilihatnya, tambahan pula beliau dimuliakan oleh gabenor, maka timbullah rasa hasad dengki di kalangan orang-orang kenamaan dan sesetengah ulama' tempatan terhadapnya. Mereka telah berusaha supaya Imam Syafi'e dilucutkan dari jawatannya yang tinggi itu, tetapi usaha mereka tidak berjaya.

Akhirnya mereka membuat fitnah dengan menghantar surat kepada khalifah Harun Al-Rasyid menceritakan kononnya Imam Syafi'e telah berkomplot dengan beberapa orang tertentu dari golongan 'Alawiyyin (golongan yang menyokong saidina Ali ketika berlaku perbalahannya dengan Saidina Mu'awiyah dan berjuang untuk mengembalikan pemerintahan kepada keluarga Saidina Ali) untuk melakukan huru-hara dan menjatuhkan kerajaan Bani Abbasiah. Mereka menyarankan agar kesemua mereka ini dan Imam Syafi'e di bawa ke Iraq. – Ibid.

---

## 2. Pengembaraan Kali Pertama Ke Iraq Dan Ujian Getir

Ahli sejarah berpendapat, kedatangan Imam Syafi'e ke Iraq, walaupun sebagai seorang tahanan, dianggap sebagai pengembaraan kali pertama.

Setelah sampai kepada khalifah Harun Al-Rasyid surat yang ditulis oleh Hammad Al-Barbari iaitu salah seorang pemimpin tertinggi di Yaman yang memfitnah Imam Syafi'e beserta dengan belasan orang "Alawiyyin, khalifah telah membalas surat tersebut dengan memerintahkan supaya mereka semua dibawa ke Baghdad untuk menghadap khalifah dan dikenakan hukuman.

Mengikut riwayat yang diterima dari Abdullah bin Muhammad Al-Balawi, Imam Syafi'e dan orang 'Alawiyyin telah sampai di Baghdad pada malam Isnin, 10 Sya'ban, 184 Hijrah dalam keadaan kakinya dirantai. Ketibaan Imam Syafi'e mengikut riwayat dan pendapat paling kuat adalah selepas kematian Imam Abu Yusuf lebih kurang setahun atau dua tahun. Ketika itu Imam Syafi'e baru menjangkau umur 34 tahun.

Mengikut setengah riwayat, pada permulaannya,

---

kesemua mereka termasuk Imam Syafi'e telah dijatuhkan hukuman pancung sampai mati. Tetapi, apabila tiba giliran Imam Syafi'e, disebabkan kepandaiannya berdialog dan berhujah di hadapan Khalifah Harun Al-Rasyid, beliau hanya dijatuhkan hukuman penjara.

Suatu ketika berlaku perdebatan hebat di antara Imam Muhammad bin Hasan dan Imam Syafi'e di suatu majlis ilmu yang berkesudahan dengan kemenangan berpihak kepada Imam Syafi'e, kerana hujah-hujah yang diutarakan oleh beliau tidak dapat disanggah oleh Imam Muhammad bin Hasan. Berkebetulan perdebatan itu telah disaksikan oleh seorang yang rapat dengan khalifah yang bernama Harthamah. Harthamah sangat kagum dengan ketinggian ilmu dan kepintaran Imam Syafi'e berhujah. Beliau lantas segera menceritakan peristiwa tersebut kepada khalifah. Justeru itu, Imam Syafi'e telah dibebaskan dan dihadiahkan pula wang sebanyak dua ribu atau lima ribu mengikut sesetengah riwayat oleh khalifah Harun Al-Rasyid.

Semenjak dari peristiwa itu dan setelah Khalifah mengetahui bahawa Imam Syafi'e adalah berbangsa Quraish dari keturunan Bani Abdu Muttalib dan sebelum ini beliau telah difitnah

---

Imam Syafi'e telah dipandang tinggi oleh khalifah. Ini dapat dibuktikan, bila mana pernah suatu ketika, khalifah telah menawarkan jawatan qadi kepada beliau dan kadang-kadang dijemput mengadap semata-mata untuk memberi nasihat dan tazkirah kepada khalifah.

Selepas Imam Syafi'e terselamat dari fitnah dan ujian getir tersebut, beliau terus tinggal dengan Imam Muhammad bin Hasan, berguru dengan beliau mengenai feqah Imam Abu Hanifah dan sahabat-sahabatnya, meriwayatkan hadis-hadis, menyalin dan mencatatkan semua pandangan Imam Muhammad bin Hasan.

Dalam pada itu, oleh kerana Imam Syafi'e mendapat didikan awal dari madrasah AHLI HADIS dan Imam Muhammad bin Hasan pula dari madrasah AHLI RA'YI, maka sentiasalah berlaku perselisihan pendapat dan perdebatan hangat di antara keduanya sehingga perdebatan ini telah dicatat dengan panjang lebar dan dimasyhurkan di dalam kitab-kitab sejarah- Ibid

### **3. Mimpi Dalam Penjara**

Imam Baihaqi meriwayatkan dari Imam Al-Imam Al-Rabi' bahawa Imam Syafi'e suatu hari menceritakan:-

---

“Suatu malam ketika saya dalam penjara di Baghdad, saya telah bermimpi didatangi oleh saidina Ali ra. Saidina Ali telah duduk di hadapan saya. Beliau lalu memecat cincin yang dipakainya, dan kemudian menyarungkannya ke tangan saya. Saya telah memceritakan tentang mimpi saya tersebut kepada Imam Muhammad bin Hasan dan meminta beliau supaya mencari seseorang yang handal dalam ta’bir mimpi. Apabila penta’bir mimpi datang, saya telah menceritakan kepadanya tentang mimpi tersebut. Katanya “ Jika benar mimpi tuan guru itu, suatu hari nanti segala pandangan dan pendapat tuan guru akan tersebar dan akan diamalkan di seluruh pelosok dunia di mana saja sampainya dan tersebarnya nama Saidina Ali R.A.”.

#### **4. Guru Imam Syafi’e di Iraq**

Di antara guru-guru Imam Syafi’e di Iraq ialah:-

1. Imam Muhammad bin Hassan Al-Syaibaani Al-Kufi
2. Imam Waki’ bin Al-Jarrah Al-Kufi
3. Imam Abu Usamah Hammad bin Usamah Al-Kufi
4. Imam Maruan bin Mu’awiyah al-Fazari
5. Imam Abu Mu’awiyah Al-Dharir

- 
6. Imam Abdul Wahab bin Abdul Majid Al-Thaqafi
  7. Imam Ismail bin Ibrahim bin 'Ulliyah Al-Basri
  8. Imam Yusuf bin Khalid Al-Taimi Al-Basri
  9. Imam Umar bin Jabir Al-Qadhi
  10. Imam Abu Qutni Amru bin Al-Haitham bin Qutni Al-Qat'iyyi Al-Basri
  11. Imam Sa'id bin Maslamah bin Hisyam bin Abdul Malik bin Maruan- Ibid

## **5. Kembali Ke Mekah**

Al-Hafiz Ibnu Hajar menyatakan bahawa, selepas menimba ilmu sebanyak mungkin daripada ulama' Iraq dan sebelum ini daripada ulama' Hijaz, Imam Syafi'e merasakan bahawa kini sudah tiba masanya untuk beliau mengajar dan menyebarkan segala ilmu yang dimilikinya. Bertepatan pula pada masa itu, kemasyhurannya sebagai seorang ulama' yang mempunyai banyak keistimewaan dan berlainan dari yang lain, telah tersebar luas ke merata negeri dan seluruh ceruk rantau tanah Arab. Justeru itu, beliau telah mengambil keputusan untuk kembali ke Makkah.

Setiba di Mekah, tempat yang menjadi pilihan pertama dan utama baginya untuk mengajar dan

---

menyebarkan ilmu kepada masyarakat setempat dan luar ialah Masjid Al-Haram, yang sebelum ini merupakan tempat beliau berulang-alik dari rumah untuk belajar dan menimba ilmu pengetahuan. Sebagaimana kebiasaannya, bila tiba musim haji, puluhan ribu manusia dari setiap ceruk rantau akan datang ke Makkah untuk menunaikan rukun haji. Kesempatan ini digunakan sebaiknya oleh Imam Syafi'e di dalam menyebarkan ilmunya. Oleh kerana itu, namanya cepat dikenali dan kehebatannya segera tersebar ke setiap negeri.

Pada masa yang sama, kota Makkah juga dikunjungi oleh berbagai peringkat ulama'. Boleh dikatakan kesemua ulama' yang pernah mendengar pengajaran yang disampaikan oleh Imam Syafi'e merasa kagum dan terpegun dengan ilmunya terutama ilmu USUL FIQAH yang baru diasaskan oleh beliau. Ini kerana ilmu usul fiqah yang mengandungi kaedah-kaedah tertentu untuk mengeluarkan hukum, yang diasaskan berdasarkan Al-Quran dan hadis, belum pernah diperkatakan oleh ulama'-ulama' sebelumnya.

Di antara ulama' terkemuka yang datang ke Mekah untuk menunaikan haji ialah Imam Ahmad bin Hambal. Selain untuk menunaikan haji, kedatangan Imam Ahmad adalah juga untuk bertemu, menimba

---

ilmu, bermuzakarah dan mendengar pandangan dan fatwa-fatwa baru dari ulama'-ulama' terkemuka yang berada di Makkah pada masa itu seperti Imam Sufian bin 'Uyainah yang juga merupakan guru kepada Imam Syafi'e. Pertama kali memasuki majlis ilmu Imam Syafi'e dalam masjid Al-Haram, Imam Ahmad merasakan apa yang diajar oleh Imam Syafi'e tidak pernah didengari olehnya sebelum ini dari ulama'-ulama' besar lainnya terutama yang berkaitan dengan bidang ilmu hadis, fekah dan ilmu usul feqah. Menyedari banyak keistimewaan dan kelainan tersebut, mulalah Imam Ahmad berjinak-jinak dengan majlis ilmu Imam Syafi'e, sehinggalah pada suatu ketika beliau telah meninggalkan semua majlis ilmu lainnya yang dikendalikan oleh ulama'-ulama' terbilang pada masa itu.

Imam Syafi'e berterusan menyampaikan ilmunya dalam masjid Al-Haram yang memakan masa hampir sembilan tahun. - Ibid

## ULASAN

<sup>16</sup> Al-Hafiz Ibnu Hajar menyebutkan bahawa, kedatangan Imam Syafi'e ke Iraq pada tahun 195 Hijrah ialah untuk kali yang kedua. Pada masa ini, kerajaan Islam Abbasiyah diperintah oleh khalifah Al-Ma'mun. Pengembaraan kali ini mempunyai

---

banyak erti dan keistimewaan kepada Imam Syafi' kerana sebelum ini namanya telah dimasyhurkan oleh beberapa orang ulama' terkenal yang pernah mengikuti majlis ilmu Imam Syafi'e dalam masjid Al-Haram di Mekah seperti Imam Ahmad bin Hambal, Imam Ishaq bin Rahawaih, Imam Abu Rahman bin Al-Mahdi dan lainnya. Di antara keistimewaan tersebut ialah Allah telah membukakan pintu hati masyarakat di Iraq pada masa itu untuk menerima pendapat Imam Syafi'e dan sehingga sanggup meninggalkan ajaran yang diamalkan sebelumnya iaitu pendapat Imam Abu Hanifah dan sahabat-sahabatnya.

Dalam masa dua tahun menetap di Iraq, ia bukanlah bermaksud Imam Syafi'e berterusan tinggal di sana tetapi sebaliknya Imam Syafi'e berulang-alik ke kota Makkah.- Ibid.

## ULASAN

- <sup>17</sup> Qaul Qadim atau Pendapat Lama ialah mana-mana pendapat atau pandangan Imam Syafi'e sama ada berupa perkataan, tulisan atau fatwa yang dinyatakan oleh beliau semasa tinggal di Iraq sebelum ke Mesir iaitu di antara tahun 195 – 196 Hijrah. Terdapat sebanyak 20 pendapat Qaul Qadim yang masih dipakai sampai ke hari ini. Di antara

---

kitab Qaul Qadim ialah:-

1. Al-Hujjah

Kitab yang berhubung dengan ilmu Feqah ini dikarang semasa beliau berada di Baghdad. Ada sebilangan ulama' menamakannya sebagai "Al-Mabsuut". Ianya disebar dengan meluas oleh sahabat-sahabatnya di Baghdad terutamanya oleh Imam Al-Za'faran dan Imam Al-Karabisi.

2. Al-Risalah

Mengikut setengah riwayat, beliau mengarang kitab ini atas permintaan Imam Abdul Rahman bin Al-Mahdi iaitu salah seorang ulama' Hadis yang terkenal pada masa itu.

Al-Risalah ini dikenali juga sebagai Al-Risalah Qadimah. Kitab ini khusus membahaskan ilmu Usul Fiqah bukannya ilmu Feqah kerana ia hanya menunjukkan cara-cara atau panduan yang betul untuk mengkaji nas Al-Quran atau Hadis bagi merumuskan sesuatu hukum, untuk memastikan sumber hukum yang dijadikan dalil itu tepat.

Kitab ini dianggap sebagai perintis dan penunjuk jalan dalam ilmu usul Feqah kerana sebelum ini tidak ada ulama' lain yang menerokainya. Ramai ulama' pada masa itu kagum membaca kitab ini, kerana kandungannya merupakan suatu penemuan

---

baru bagi mereka. Dengan sebab kitab ini juga, Imam Syafi'e telah dianggap sebagai pengasas ilmu usul Feqah.- Ibid.

### **MURID-MURID QAUL QADIM**

Di antara murid-murid Imam Syafi'e yang masyhur dari Qaul Qadim ialah:-

1. Imam Ahmad bin Hambal Al-Syaibani.

Seorang yang faqih lagi mahir dalam ilmu Hadis. Salah seorang di antara murid yang sangat rapat dengan Imam Syafi'e pada kebanyakan waktunya. Beliau banyak menerima ilmu dari Imam Syafi'e berbanding ulama'-ulama' lain kerana menghadiri hampir setiap majlis ilmu yang dikendalikan oleh Imam Syafie. Beliau di antara murid paling masyhur Imam Syafi'e kerana beliau kemudiannya telah mencipta mazhabnya sendiri yang dikenali sekarang dengan nama mazhab Hambali. Wafat pada tahun 241 Hijrah.

2. Imam Abu Ali Al-Hasan bin Muhammad bin Al-Sabbah Al-Za'faraani.

Berasal dari Za'faran tetapi kemudian pindah ke Baghdad untuk mencari ilmu. Selain Imam Syafi'e, beliau juga berguru dengan Imam Sufian bin 'Uyainah dan ulama' lainnya yang terkemuka pada masa itu.

---

Seorang yang Pakar dalam ilmu Feqah, Hadis dan bahasa Arab sehingga kebolehan nya dikagumi oleh Imam Syafi'e sendiri. Beliau dianggap di antara murid paling kuat berpegang dengan Qaul Qadim iaitu pendapat lama.

Banyak riwayat hadis yang dibawa oleh Imam Al-Za'faran diterima baik oleh para ulama' Hadis, termasuklah Imam Al-Bukhari dalam kumpulan sahihnya. Wafat pada bulan Imam Al-Rabi'ul Akhir tahun 249 Hijrah.

3. Imam Abu Ali, Al-Hasan bin Ali bin Yazid Al-Baghdadi Al-Karabisi.

Pada mulanya, beliau belajar dengan beberapa orang ulama' Feqah di Iraq, kemudian barulah berguru dengan Imam Syafi'e. Bersungguh-sungguh mendalami ilmu Feqah dan Hadis sehingga beliau menjadi terkenal dengan kedua-dua ilmu tersebut.

Seorang imam yang suka mengeluarkan pendapat berdasarkan kombinasi di antara Feqah dan Hadis. Bagaimanapun, beliau dikatakan terlalu lantang mengkritik pendapat Imam Ahmad bin Hambal dan terlalu berani mengemukakan pendapat-pendapat baru yang berlawanan dengan pendapat ulama' Hadis sehingga pada akhirnya beliau tidak

---

lagi disukai. Wafat pada tahun 245 Hijrah atau 248 Hijrah mengikut sesetengah pendapat ulama'.

4. Imam Abu Thaur, Ibrahim bin Khalid bin Al-Yaman Al-Kalbi Al-Baghdadi.

Permulaannya, beliau belajar dengan sahabat-sahabat Imam Abu Hanifah sehingga beliau menjadi penganut mazhab Hanafi. Tetapi selepas itu terus menjadi pengikut Imam Syafi'e, setelah Imam Syafi'e sampai ke Iraq. Pada akhirnya Imam Abu Thaur telah mencipta mazhabnya sendiri. Mengikut sesetengah riwayat, mazhab ini mempunyai penganutnya sendiri sehingga ke kurun 5 Hijrah. Menurut Imam Ibnu Hibban, Abu Thaur adalah salah seorang ulama' Feqah yang unggul sesudah Imam Syafi'e.

Beliau juga pakar dalam ilmu hadis, walaupun sesetengah pendapatnya dalam bidang ini bertentangan dengan kebanyakan ulama' hadis pada masa itu. Menurut Imam Syafi'e sendiri, Abu Thaur adalah seorang yang boleh dipercayai tentang riwayat yang dibawanya. Wafat pada tahun 240 Hijrah.- Ibid.

---

## ULASAN

<sup>18</sup> Ini merupakan pengembaraan kali ketiga Imam Syafi'e ke Iraq. Menurut riwayat dari Imam Za'faran, Imam Syafi'e datang kali ini hanya untuk beberapa bulan sahaja - Ibid

## ULASAN

<sup>19</sup> Menurut Imam Baihaqi di antara faktor utama yang menyebabkan Imam Syafi'e mengambil keputusan untuk keluar dari Baghdad ialah kerana pemerintah Bani Abbas yang dipimpin oleh khalifah Al-Ma'mun dan masyarakat kota Baghdad pada masa itu telah terpengaruh dengan beberapa aliran pemikiran ilmu kalam yang tidak sihat seperti fahaman Mu'tazilah. Bid'ah wujud di sana-sini sehingga ada sesetengah golongan dalam masyarakat mula membelakangi sunnah. Suasana seperti ini cukup tidak digemari oleh Imam Syafi'e yang berkebetulan beliau pula merupakan seorang yang berpegang kuat dengan sunnah dan pakar dengan selok-belok ilmu kalam. Mesir menjadi pilihan utama Imam Syafi'e kerana, kata Imam Baihaqi, mengikut pengetahuan Imam Syafi'e mazhab Malik telah masyhur di Mesir dan begitu juga mazhab Hanafi. Imam Syafi'e merasa yakin bahawa mazhabnya yang agak mempunyai kelainan berbanding dua mazhab sebelumnya akan diberi sambutan yang menggalakkan oleh penduduk Mesir setelah mereka mengadakan perbandingan di

---

antara kesemua mazhab. Ini kerana asas pendapatnya merupakan kombinasi dari dua fahaman berbeza iaitu **MADRASAH AHLI HADIS DAN MADARASAH AHLI RA'YI.**

Ada juga riwayat yang mengatakan bahawa Imam Syafi'e ke Mesir atas undangan ramai kawan-kawannya yang pernah belajar bersama –sama dengannya di majlis ilmu Imam Malik di Madinah dulu. Riwayat yang berikutnya pula mengatakan pemergian Imam Syafi'e ke Mesir adalah atas undangan gabenor baru Mesir iaitu Abbas bin Musa yang inginkan beliau mengembangkan ilmu Feqahnya di sana.

Ketika keluar ke pinggir kota Baghdad untuk ke Mesir, Imam Syafi'e telah diiringi oleh sebilangan ulama'-ulama' besar, murid-muridnya dan ramai pencinta ilmu seperti Imam Ahmad bin Hambal dan lain-lainnya. Suasana sedih, hiba dan linangan air mata mengiringi pengembaraan Imam Syafi'e ke Mesir. Ketika Imam Syafi'e telah jauh meninggalkan mereka, Imam Ahmad bin Hambal berkata kepada orang-orang di kelilingnya “ **Sesungguhnya ilmu feqah telah terkunci di Iraq, lalu Allah telah membukanya kembali dengan perantaraan Imam Syafi'e.**”

---

Imam Syafi'e telah sampai ke Mesir pada 28 Syawal, 198 Hijrah. Beliau telah dipersilakan, menurut sesetengah riwayat, oleh gabenor Abbas bin Musa supaya tinggal di istananya. Tetapi tawaran tersebut ditolak oleh Imam Syafi'e secara baik.

Kata Imam Baihaqi, sebaliknya Imam Syafi'e telah tinggal di rumah kerabatnya iaitu paman sebelah ibunya. Tindakan ini diambil oleh Imam Syafi'e adalah kerana mengikut sunnah Rasulullah S.A.W. ketika mula-mula sampai ke Madinah dulu.. Rasulullah di saat mula-mula sampai di Madinah, mengikut riwayat dari Al-Barra' dari saidina Abu Bakar, telah tinggal di rumah qabilah bani Al-Najjar iaitu paman sebelah ibu kepada datuknya Abdul Muttalib.

Di Mesir, untuk beberapa ketika Imam Syafi'e pernah menumpang tinggal di rumah sahabatnya semasa belajar di majlis Imam Malik di Madinah dulu iaitu Imam Abdullah bin Abdul Hakam. Imam Abdullah ingin membalas jasa baik Imam Syafi'e yang telah membacakan kitab Al-Muwatta' kepadanya untuk di tulis semasa di Madinah dulu. Di samping mengajak Imam Syafi'e tinggal di rumahnya, Imam Abdullah juga menghadihkan kepada Imam Syafi'e sebanyak 5,000 dinar iaitu 1,000 dinar dari miliknya sendiri sementara selebihnya adalah hadiah dari para pencinta

---

ilmu, termasuk para pembesar negeri Mesir.

### **Pengajaran Di Mesir**

Kuliah yang diadakan oleh Imam Syafi'e beransur diminati ramai hingga timbul juga rasa kurang senang terhadap kemasyhurannya itu di kalangan sesetengah ulama' terutama yang kuat berpegang dengan dua mazhab sebelumnya iaitu mazhab Maliki dan Hanafi sehingga ada di antaranya yang telah mengkritik beliau. Tetapi beliau tegas dengan fatwa-fatwa dan pendapatnya dengan sokongan hujah-hujah yang kuat dan sukar ditolak sehingga akhirnya pengikut dan muridnya menjadi bertambah ramai di Mesir. Dengan permintaan orang ramai, Imam Syafi'e kemudiannya telah memindahkan majlis ilmunya ke masjid Amru bin Al-As. Di masjid ini beliau memulakan kuliahnya selepas sembahyang Subuh dan berakhir sehingga waktu Zohor.

Imam Syafi'e sering menasihati para muridnya agar berfikiran terbuka dan lebih bebas dalam urusan-urusan mu'amalat dan tegas dalam masalah yang melibatkan aqidah dan ketuhanan. Katanya: "Bila saya menerangkan sesuatu alasan bagi sesuatu hukum, janganlah kamu menerimanya secara melulu dan membuta tuli, tetapi sebaliknya gunakanlah kepintaran akal dan ilmu kamu itu, untuk membuat penelitian dan kajian kerana fikiran itu perlu

---

digunakan untuk mencari kebenaran.- Ibid

## ULASAN

<sup>20</sup> Qaul Jadid atau pendapat baru ialah mana-mana pendapat atau pandangan Imam Syafi'e sama ada berbentuk perkataan, tulisan atau fatwa yang dikeluarkan oleh beliau semasa berada di Mesir, iaitu semenjak akhir tahun 199 Hijrah sehingga wafatnya pada tahun 204 Hijrah, yang memakan masa tidak lebih dari 5 tahun.

Imam Baihaqi menyatakan bahawa apabila sampai di Mesir, Imam Syafi'e telah menempuhi suatu pengalaman baru, suasana baru dan budaya hidup masyarakat, yang belum ditemuinya sebelum ini.

Keadaan dan faktor ini mempengaruhi sudut ijtihadnya dan fatwa-fatwa yang dikeluarkannya sehingga beliau terpaksa menyemak kembali segala pendapatnya yang terdahulu semasa di Iraq. Justeru itulah, Imam Syafi'e memperbetulkan kembali kecacatan, kelemahan dan kepincangan pendapatnya yang terdapat dalam kitab-kitabnya dalam Qaul Qadim dengan menyusun dan membukukan kembali pendapat barunya yang kemudian dikenali dengan nama Qaul Jadid.

---

Suatu Hari Imam Muhammad bin Muslim bin Waad Al-Razi telah meminta pandangan Imam Ahmad Hambal mengenai perbandingan di antara kitab-kitab yang dikarang oleh Imam Syafi'e semasa di Iraq dan Mesir, kata Imam Ahmad, "Hendaklah kamu membandingkan dan beriltizam dengan pendapat-pendapat yang telah dibukukan oleh Imam Syafi'e semasa beliau berada di Mesir kerana semua pendapat-pendapat baru yang telah dianalisis, disemak dan ditahqiqkan kembali oleh beliau berbanding pendapat sebelumnya."

Di antara kitab-kitab Imam Syafi'e dalam Qaul Jaiz ialah:

1. Al-Risalah AL-Jadidah

Kitab ini merupakan lanjutan daripada kitab Al-Risalah Al-Qadimah. Segala isi kandungan kitab Al-Risalah Al-Qadimah telah dianalisis, disemak dan ditahqiq semula oleh Imam Syafi'e semasa beliau berada di Mesir. Pengumpulan isi kitab ini diusahakan oleh Imam Al-Imam Al-Rabi' bin Sulaiman Al-Muradi. Kitab inilah yang berada di tangan ulama' sehingga sekarang ini.

Kitab ini memperkatakan tentang Al-Quran dan Hadis dan kedudukannya dalam sumbu perundangan Islam, tentang nasakh dan mansukh yang terdapat dalam Al-Quran dan Hadis, tentang berhujah dengan Hadis Ahad, tentang Ijma', Qi

---

Ijtihad, Istihsan dan lainnya sebagai sebahagian daripada sumber perundangan Islam.

## 2. Al-Um

Sebuah kitab feqah yang disepakati oleh ulama' bahawa ianya adalah karangan Imam Syafi'e. Ianya ditulis dan diriwayatkan oleh Imam Al-Imam Al-Rabi' bin Sulaiman Al-Maradi. Mengikut catatan Dr. Ahmad Nahraawi, kitab ini adalah lanjutan kepada kitab Al-Hujjah yang dikarang oleh beliau semasa berada di Iraq. Kitab Al-Hujjah dan Al-Umm ini juga dikenali sebagai Al-Mabsuut.

Al-Um ini merupakan sebuah kitab Feqah yang besar dan terperinci perbahasannya, diakui sebagai kitab paling unggul pada zamannya kerana ia mengemukakan pendapat aliran mazhab Syafie yang jelas dan lengkap berserta dengan dalil-dalilnya sekali. Di antara keistimewaannya lagi, ianya mempunyai susunan bahasa yang tepat, jelas dan indah bersesuaian dengan kehebatan Imam Syafi'e sebagai seorang ahli dan pakar bahasa. Kitab ini telah diterjemahkan ke dalam beberapa bahasa.

## 3. Mukhtasar Al-Buwaiti

## 4. Mukhtasar Al-Muzani

---

Mengikuti catatan Imam Ibnu Hajar Al-Maki Kit Al-Umm ini telah diringkaskan menjadi Mukhtas Al-Muzani yang kemudiannya disyarah dan dihuraikan oleh Imam Al-Haramain yang diberi nama Nihayah Al-Mutlab Fi Tahrir Al-Mazhab.

5. Al-Imla'

Mengikuti satu riwayat lagi, kitab Al-Umm, Al-Imla', Mukhtasar Al-Buwaiti dan Al-Muzani kesemua kitab ini telah diringkaskan menjadi satu kitab oleh Imam Haramain dengan nama seperti di atas tadi.- Fawaa'id Al-Makkiah, Al-Imam Al-Syafi'e Fi Mazhabaihi Al-Qadim Wa Al-Jadid. Doktor Ahmad Nahrawi Abdus Salam.

### **MURID-MURID QAUL JADID.**

Di antara murid-murid ternama Imam Syafi'e dalam Qaul Jadid ialah:-

1. Imam Abu Ya'qub Yusuf bin Yahya Al-Qurai Al-Buwaiti Al-Misri

Beliau dianggap sebagai murid paling kanan dan menjadi pengganti kepada Imam Syafi'e selepas kewafatannya. Sangat tekun belajar ilmu feqah dan Hadis. Seorang yang rajin bersembahyang dan setiap hari mengkhatamkan Al-Quran sebanyak sekali. Sebelum menghadiri majlis ilmu Imam Syafi'e, beliau telah belajar dengan beberapa orang ulama' lain yang terkemuka seperti Imam Ibn

---

Wahbin dan lainnya.

Semasa Imam Syafi'e masih hidup, beliau telah diberi izin untuk berfatwa.

Imam Baihaqi telah meriwayatkan dari Imam Al-Imam Al-Rabi' bin Sulaiman Al-Muradi katanya, "Ketika Imam Syafi'e sakit tenat berlakulah pertelingkahan di kalangan murid Imam Syafi'e mengenai siapakah yang lebih layak menggantikan tempatnya selepas kewafatannya. Kata Imam Al-Humaidi "Saya telah dengar Imam Syafi'e berkata, "Tidak ada seorangpun yang lebih layak untuk menggantikan tempat saya selain dari Yusuf bin Yahya kerana dialah orang yang paling alim dari kalangan murid saya." Justeru itu bila Imam Syafi'e wafat, beliau telah diangkat oleh kawan-kawannya meneruskan majlis ilmu Imam Syafi'e dan memberi fatwa.

Beliau telah membuat catatan yang cermat tentang apa saja yang diterima dari Imam Syafi'e. Beliaulah yang menyebarkan mazhab Syafie dengan tekun dan gigih, baik di Mesir sendiri mahupun di negara-negara lain. Beliau memiliki sebuah kitab yang masyhur iaitu Mukhtasar Al-Buwaiti yang diringkaskan dari pendapat-pendapat Imam Syafi'e. Beliau telah dipenjarakan di

---

Baghdad, menepati ramalan Imam Syafi'e sebelum ini, kerana enggan mengatakan bahawa Al-Quran kalam baru sehingga wafat di dalam penjara pada hari Jumaat tahun 231 Hijrah atau 232 Hijrah mengikut sesetengah pendapat ulama' . - Ibid

2. Imam Abu Ibrahim Ismail bin Yahya Al-Muzani Al-Misri.

Beliau belajar dari beberapa ulama' lain yang terkenal sebelum kedatangan Imam Syafi'e. Kata Abu Muhammad Al-Muzani, " Abu Ibrahim Al-Muzani adalah orang paling wara' dan zuhud dari kalangan murid Imam Syafi'e." Imam Al-Syairazi pula menyebutkan bahawa Imam Al-Muzani adalah seorang alim yang zuhud dan tidak pernah terpengaruh dengan mata benda dunia. Beliau tidak suka hidup mewah walaupun beliau mampu berbuat demikian.

Seorang ahli ijtihad yang mahir memecahkan masalah-masalah sulit dalam hukum agama. Beliau tidak bertaklid secara melulu kepada Imam Syafi'e tetapi sebaliknya terlebih dahulu meneliti segala nas yang kedapatan di sebalik mana-mana fatwa gurunya. Dalam pada itu beliau sangat berpegang kuat kepada pendapat Imam Syafi'e dan sentiasa membela fatwa gurunya sehingga Imam

Syafi'e wafat. Imam Syafi'e pernah berkata kepada para muridnya, " Al-Muzani adalah pembela mazhabku." Beliau juga terkenal di kalangan murid Imam Syafi'e sebagai seorang yang suka menghimpun dan menyusun kitab-kitab Imam Syafie. Beliau sendiri mempunyai Mukhtasar Al-Muzani iaitu sebuah kitab yang diringkaskan dari pendapat dan pandangan Imam Syafi'e.

Imam Al-Muzani kemudiannya mempunyai ramai muridnya sendiri yang datang dari Khurasan, Iraq, Mesir dan lainnya. Wafat pada tahun 264 Hijrah ketika berumur 87 tahun dan ditanamkan berhampiran kubur Imam Syafi'e.- Ibid

3. Imam Abu Muhammad Al-Imam Al-Rabi' bin Sulaiman bin Abdul Rahman Al-Muraadi Al-Muazzin Al-Misri.

Belajar dengan Imam Syafi'e semenjak beliau mula-mula sampai ke Mesir. Belajar berbagai-bagai ilmu dari Imam Syafi'e tetapi kemudiannya menjadi terkenal dan pakar dalam ilmu feqah dan Hadis. Bila disebut di dalam kitab mazhab Syafie nama Al-Imam Al-Rabi' maka ianya bermaksud Al-Imam Al-Rabi' Al-Muraadi.

---

Beliau diberi kepercayaan menjadi penulis kepada kitab-kitab Qaul Jadid yang baru dikarang oleh Imam Syafi'e kerana kebenaran, kemantapan dan cermatnya dalam riwayat dan nukilan sebagaimana diakui sendiri oleh Imam Al-Buwaiti dengan katanya, "Al-Imam Al-Rabi' pada pandangan Imam Syafi'e lebih mantap dan cermat riwayat dan nukilannya daripada saya"

Beliau sangat menghormati Imam Syafi'e dan menjadi murid yang paling disayangi kerana selalu mendampingi gurunya dan sangat suka berkhidmat dan berbakti kepada kerja-kerja hari Imam Syafi'e. Imam Syafi'e pernah mengalah dengan katanya, " Tidak ada seorangpun dalam kalangan murid saya yang suka berbakti dan berkhidmat untuk saya sebagaimana yang dilakukan oleh Al-Imam Al-Rabi'."

Beliau sentiasa merujuk kepada kitab-kitab karangan Imam Syafi'e bila berhadapan dengan sesuatu masalah baru. Beliau juga mempunyai ramai murid dari luar Mesir. Wafat pada bulan Syawal tahun 270 Hijrah.- Ibid

4. Imam Abu Muhammad Al-Imam Al-Rabi' bin Sulaiman bin Daud Al-Azdi Al-Jiizi.  
Wafat pada bulan Zul-Hijjah tahun 256 Hijrah.

---

5. Imam Abu Najib Harmalah bin Yahya Al-Tujaibi Al-Misri.

Pada permulaannya, beliau berguru dengan Imam Ibnu Wahbin. Selain pakar dalam Feqah, beliau juga seorang ahli Hadis. Beliau telah menghafal lebih dari 10.000 hadis. Hadis-Hadisnya diambil oleh para ulama' Hadis terkenal seperti Imam Muslim, Imam Ibnu Qutaibah, Imam Hasan bin Sufian dan lain-lainnya. Wafat pada bulan Syawal tahun 243 Hijrah.

6. Imam Abu Abdullah Muhammad bin Abdullah bin Abdul Hakam Al-Misri.

Seorang yang pakar dalam ilmu Feqah. Kata Muhammad bin Ishak, " Tidak pernah saya berjumpa dengan seorang yang terlebih faqih dalam masalah Feqah selain Muhammad bin Abdullah bin Al-Hakam." Imam Syafi'e pernah berkata, " Alangkah beruntungnya jika sekiranya saya mempunyai seorang anak seperti Muhammad bin Abdullah."

Beliau bagaimanapun berpindah kepada mazhab Imam Malik dua bulan selepas kewafatan Imam Syafi'e, ekoran pertelingkahan yang berlaku di

---

antaranya dengan Imam Al-Buwaiti. Wafat pada bulan Zul- Qi'dah tahun 264 Hijrah.- Ibid

7. Imam Abdullah bin Al-Zubair Al-Maki Al-Humaidi.

Beliau berguru dengan Imam Syafi'e semenjak di Makkah lagi. Kemudian berterusan mengikuti Imam Syafi'e ke mana saja beliau pergi, ke Baghdad, Iraq, ke Mesir dan seterusnya sehingga Imam Syafi'e Wafat. Selepas itu beliau kembali sebagai seorang mufti di Makkah. Wafat pada tahun 219 Hijrah. -Ibid

8. Imam Abu Musa Yunus bin Abdul A'la Al-Sodafi al-Misri.

Mendalami ilmu feqah dan hadis dengan Imam Syafi'e. Wafat Pada bulan Imam Al-Rabi'ul Akhir tahun 264 Hijrah.- Ibid.

## ULASAN

<sup>21</sup> Kesibukan dan ketekunan Imam Syafi'e dalam penyebaran ilmu pengetahuan dapat dibuktikan melalui banyaknya kitab-kitab yang sempat dikarang oleh Imam Syafi'e, walaupun umurnya bukan terlalu panjang. Selain kitab-kitab masyhur dalam Qaul

---

Qadim dan Jadid, Imam Baihaki telah menyebutkan karangan-karangannya yang lain, di antaranya ialah:-

1. Ikhtilaf Al-Hadis
2. Jama' Al-'Ulum
3. Ibtal Al-Istihsan
4. Ahkam Al-Quran
5. Bayan Al-Gharadh
6. Sifah Al-Amru wal An-nahyu
7. Fadhaa'il Quraisy
8. Ikhtilaf Malik wal Al-Syafie
9. Ikhtilaf Al-'Iraqiyyin
10. Kitab Al-Sunnah
11. Kitab Al-Musnad
12. Musnad Al-Syafie

## 9. KEDUDUKAN IMAM SYAFI'E DI KALANGAN PARA ULAMA<sup>22</sup>

Kemuliaan dan kemasyhuran Imam Syafi'e bukan saja tersebar di negeri Iraq, bahkan nama beliau dikenal dan disebut-sebut di seluruh penjuru dunia. Kebesaran beliau juga diakui oleh kawan mahupun lawan, disegani oleh para khalifah dan penguasa. Keagungan dan kehebatannya jelas terserlah hasil dari perdebatan beliau dengan tokoh-tokoh ilmuan terkemuka di negeri Iraq serta ulama-ulama lainnya.

Murid-murid beliau tidak hanya terbatas kepada masyarakat awam sahaja bahkan para ulama', sehingga banyak di antara mereka yang sanggup meninggalkan mazhab yang dianuti semata-mata untuk menjadi pengikut setia mazhab Syafi'e. Mereka ialah seperti Imam Abu Tsaur, Imam Al-Za'farany dan lain-lainnya. Bahkan sebahagian besar dari mereka tidak lagi berguru kepada imam-imam dan syekh-syeikh yang lain selain Imam Syafi'e, kerana ilmu yang mereka timba dari beliau adalah sesuatu yang tidak mereka temui pada ulama'-ulama' lainnya.<sup>23</sup>

---

### ULASAN

- <sup>22</sup> 1. Imam Al-Hakim telah meriwayatkan dari Imam Al-Faqih yang menceritakan bahawa suatu hari ada seorang ahli ilmu berkata kepada Abu Abbas bin Suraij: "Gembiralah engkau wahai Qadi, kerana sesungguhnya Allah telah mengurniakan kepada kaum muslimin dengan Umar bin Abdul Aziz pada abad pertama Hijrah lalu dia menegakkan sunnah dan membuang bid'ah. Allah kemudian mengurniakan pula Imam Syafi'e pada abad kedua lalu beliau meninggikan Sunnah

---

dan menewaskan bidaah dan Allah telah mengurniakan kepada kaum muslimin pada abad ketiga dengan engkau, ya Ibnu Suraij.”

2. Imam Jalaluddin Al-Sayuti dalam kitabnya *Tuhfatu Al-Muhtadiin Bi Akhbar Al-Mujaddidiin* telah merakamkan kenyataan yang sama dengan apa yang dicatatkan oleh Imam Al-Hakim mengenai tiga orang tokoh besar tersebut. Pemilihan ini dibuat oleh Imam Jalaluddin Al-Sayuti berdasarkan kepada sabda Rasulullah yang bermaksud:

“Sesungguhnya Allah akan membangkitkan untuk umat ini pada permulaan setiap seratus tahun orang yang akan memperbaharui hal ehwal agamanya.”

3. Imam Al-Razi pula menyatakan bahawa kedudukan Imam Syafi'e dalam ilmu Usul Feqah sama seperti Aristoteles dalam ilmu mantiq dan Khalil bin Ahmad dalam ilmu Syair.

Sebelum Imam Syafi'e membahaskan ilmu Usul Feqah, para ulama' Feqah menggunakan dalil-dalil tanpa sebarang panduan atau kaedah tertentu untuk membandingkan dalil-dalil dan memilih mana yang lebih kuat untuk digunakan.

---

Imam Syafi'elah orang yang mencipta panduan dan kaedah untuk memilih dalil-dalil hukum syara' sehingga sekarang. Beliau berjaya berbuat demikian hanya sesudah mempelajari semua aliran pemikiran ulama' dari pelbagai mazhab di beberapa negeri yang dilawatinya dan setelah melakukan penyelidikan selama bertahun-tahun tanpa mengenal penat lelah. Beliau juga berjaya berbuat demikian kerana beliau dikurniakan oleh Allah kecerdasan fikiran yang luar biasa untuk melakukan tugas yang berat dan mencabar ini.

Imam Al-Razi menyatakan lagi bahawa, Imam Al-Syafi'e adalah satu-satunya ulama yang dapat menjelaskan cara mengistimbatkan hukum dari Al-Quran dan Hadis dengan betul, menerangkan nas-nas yang bersifat nasikh dan mansukh, antara yang mujmal dan mubayyin, antara yang khas dan am.

## ULASAN

### <sup>23</sup> **Kesimpulan Ucapan Oleh Tuan Guru Dato' Nik Abdul Aziz Bin Nik Mat.**

Berikut ialah kesimpulan daripada ucapan Tuan Guru di Seminar **IMAM SYAFIE: SEJARAH DAN PEMIKIRANNYA** di Universiti Prince Of Songkhla, Pattani, Thailand, pada 21 Jamadi Awwal, 1422 Hijrah bersamaan 11 Ogos, 2001 Masihi:-

1. Imam Syafi'e merupakan salah seorang daripada

---

imam-imam mujtahid yang teragung di sepanjang sejarah umat Islam. Malahan beliau juga dianggap sebagai tokoh kepada sejarah peradaban manusia di zamannya. Ini kerana Imam Syafi'e dan lain-lain ulama mujtahid hidup di abad ke-8 masihi iaitu zaman yang terkenal dalam sejarah sebagai zaman gelap di Eropah yang tidak memberi apa-apa sumbangan kepada ilmu dan intelektual manusia. Sedangkan Imam Syafi'e dan ulama-ulama Islam pada masa itu telah menghasilkan berbagai-bagai karya penulisan untuk panduan kehidupan umat Islam.

2. Imam Syafi'e merupakan salah seorang daripada tokoh mujaddid yang terkandung di dalam konsep **TAJDID ISLAMI** yang menepati sabda Nabi S.A.W. yang bermaksud : "Sesungguhnya Allah Taala akan membangkitkan di setiap permulaan 100 tahun, seorang tokoh mujaddid yang akan memperbaharui hal-ehwal agama-Nya". Hal ini adalah sebagaimana yang dinyatakan oleh Abu A'la Al Maududi dalam kitabnya : "TAJDID WA-IHYAA 'UHU" bahawa gerakan tajdid ini dianggap bermula satu abad sesudah kewafatan Rasulullah S.A.W., di mana tokoh mujaddid pertama ialah Khalifah Umar bin Abdul Aziz yang wafat pada tahun 101 Hijrah. Ciri utama Tajdid Islami menurut Al-Maududi ialah menghapuskan

---

seluruh sifat-sifat jahiliah dalam masyarakat dan mengembalikan kefahaman dan ajaran Islam yang sebenar.

Dalam hal ini, Imam Ahmad bin Hambal menganggap Imam Syafi'e adalah mujaddid yang kedua berdasarkan usahanya mengembalikan kemurnian pengajian Feqah. Diceritakan bahawa dalam satu majlis ada beberapa orang ulama' bercakap-cakap mengenangkan jasa dan kehebatan Imam Syafi'e. Berkebetulan pertuturan mereka didengari oleh Imam Ahmad bin Hambal yang turut berada dalam majlis tersebut Beliau lalu berkata, "Diriwayatkan daripada Rasulullah S.A.W.: "Allah akan membangkitkan kepada umat ini di permulaan setiap seratus tahun seorang mujaddid yang akan memperbaharui urusan agamanya." Sesungguhnya Umar bin Abdul Aziz telah dibangkitkan pada permulaan kurun selepas seratus tahun pertama dan aku mengharapkan bahawa Imam Syafi'e adalah mujaddid untuk kurun kedua."

3. Imam Syafi'e adalah benar-benar ulama' dari segi makna kalimah. Beliau dikatakan telah memasuki medan ilmu dari semua pintunya. Mendalami Al-Quran dan Tafsirnya, Hadis, Feqah dan Adab Al-Arabi. Sebagai ulama' beliau berfikiran terbuka

---

dan tidak mengamalkan pemikiran TALFIQ yakni bertaklid dan tidak mahu keluar dari apa-apa yang diajar secara tradisi "HARFUN BI-HARFIN". Beliau sendiri telah mempelajari ilmu fekah daripada beberapa guru yang berbeza alirannya. Jika dilihat dan diteliti terhadap sirah pengajiannya, kita akan dapati bahawa Imam Syafi'e pada permulaanya mempelajari fekah dari golongan ahli Hadis di Mekah iaitu sebelum berdamping dengan Imam Malik di Madinah. Di Madinah sewaktu mula-mula berguru dengan Imam Malik, beliau baru berusia tiga belas tahun. Imam Syafi'e berterusan mendampingi gurunya itu sehinggalah Imam Malik wafat pada tahun 179 Hijrah iaitu ketika umurnya mencecah 29 tahun. Begitu lamanya Imam Syafi'e mendalami ilmu feqah dari madrasah ahli hadis iaitu memakan masa 16 tahun. Beliau begitu kagum kepada gurunya Imam Malik. Namun sewaktu beliau dibawa ke Baghdad kerana isu-isu tertentu, beliau tidak melepaskan peluang mempelajari ilmu Feqah MADRASAH AHLI RA'YI daripada Imam Muhammad bin Hasan Al-Syaibaani dan sahabat-sahabat Imam Abu Hanifah yang lain. Sedangkan menurut Ibnu Khaldum, masa itu terdapat dua aliran pemikiran Feqah yang saling berselisih pandangan di antara satu sama lain iaitu MADRASAH AHLI AL-RA'YI WAL-

---

QIAS di Iraq dan MADRASAH AHLI HADIS di Hijaz. Tetapi dengan kistimewaan yang dikurniakan oleh Allah terhadap Imam Syafi'i beliau berjaya menjinakkan kedua-dua aliran ini

4. Ditinjau kepada hubungan Imam Syafi'i dengan guru barunya, Imam Muhammad bin Hasan, kita akan dapati di antara kedua mereka banyak berlaku perdebatan dan perbahasan dalam beberapa masalah Fiqah. Di samping banyak pendapat Imam Syafi'i yang diterima oleh Imam Muhammad Al-Syaibaani, banyak juga yang Imam Al-Syaibaani terpaksa akur dengan hujah-hujah Imam Syafi'i yang berasal dan diambil daripada pandangan Imam Malik.

Walaupun dikatakan mereka sering berdebat dan berbahas di dalam menegakkan hujah masing-masing namun mereka saling memuji dan menyanjung antara satu sama lain. Itulah adab berakhlak yang murni di dalam Islam yang patut diteruskan sampai ke akhir zaman.

5. Satu contoh lagi adab yang patut dicontohkan daripada Imam Syafi'i ialah sebagai seorang ulama' beliau lebih memilih untuk menyatukan umat Islam daripada menjadi sebagai sumber perbalahan. Dikatakan sewaktu beliau mula-mula

---

sampai di Baghdad, beliau ditanya orang siapa lebih alim di antara Imam Malik dengan Imam Abu Hanifah. Beliau menjawab Imam Malik lebih alim dalam ilmu hadis dan Imam Abu Hanifah lebih alim dalam ilmu Qias. Sewaktu solat Subuh di masjid Imam Abu Hanifah beliau tidak membaca qunut. Apabila ditanya mengapa beliau meninggalkan qunut sedangkan mengikut pendapatnya berqunut hukumnya sunat muakkad, jawabnya: "Saya menghormati tuan bagi tempat ini."

6. Imam Syafi'e adalah sebagai lambang seorang ulama' yang berfikiran terbuka dalam masalah Feqah kerana telah menyusun dan membukukan pendapatnya berdasarkan kombinasi dua aliran madrasah iaitu Ahli Hadis dan Ahli Qias atau Al-Ra'yu. Imam Syafi'e sendiri pernah menyatakan satu dasarnya yang begitu dimasyhurkan iaitu "Jika sekiranya sahlah Hadis bagi sesuatu hukum itu, maka itulah juga pendapat atau mazhabku." Bertitik tolak dari dasarnya ini, biarlah ianya menjadi iktibar dan panduan untuk umat Islam, di dalam menghadapi masalah-masalah furu' dan khilafiah. Penduduk di Nusantara walaupun kuat berpegang dengan mazhab Syafie, hendaklah mengalu-alukan juga pengajian mazhab-mazhab lain supaya dengan ini akan bertambahlah

---

khazanah ilmu pengetahuan agama ataupun Feqah di pusat-pusat pengajian agama mereka.

7. Pada akhir-akhir tahun 1930an di Kelantan berlaku khilaf antara golongan muda dan golongan tua. Apabila direnung dan diteliti pada hari ini dan dibandingkan pula dengan sejarah pengajian Imam Syafi'e dalam ilmu Feqah, bolehlah disimpulkan bahawa masalah ini berpunca akibat salah faham antara dua pihak dan berbezanya latar belakang pengajian di antara kedua-duanya.

Satu pihak belajar dan mengajar kitab Feqah dari satu aliran dan mazhab sahaja iaitu mazhab Syafi'ie sehingga taksub kepada kitabnya HARFU BIHARFIN. Tradisi kitab-kitab Feqah mazhab Syafi'ie pula, contohnya kitab FATHUL QARI hanya mengithbatkan sesuatu hukum dengan tidak banyak memberi hujah dan tidak mengemukakan pandangan-pandangan ulama' dari aliran mazhab lain sebagai perbandingan dengan pendapat dan hujah mazhab Syafi'ie. Keadaan ditambah lagi dengan tradisi penduduk di sebelah Asia Tenggara yang hanya belajar mazhab Syafi'ie sahaja dan sangat terpengaruh dengannya. Kesemua ini menyebabkan masyarakat memahaminya dan berpegang teguh dengan sesuatu hukum.

seolah-olah hukum-hukum yang tertulis dalam mazhab Syafie inilah yang paling tepat dan muktamad dan tidak ada lagi kebenaran hukum dari pandangan mazhab lainnya. Malah lebih teruk lagi ada orang dari golongan Syafi'eyah yang memandang serong terhadap mazhab-mazhab lain seolah-olah mereka tidak selari dengan ajaran Islam.

Satu pihak lagi diwakili oleh anak-anak muda yang berkesempatan keluar negeri untuk mempelajari ilmu Feqah di India, di Baghdad dan di Mesir dan didedahkan dengan Feqah empat mazhab dan pelbagai mazhab lainnya bahkan undang-undang antarabangsa turut diajar. Mazhab seperti Hanafi contohnya, kitab-kitab mereka banyak berbeza dengan kitab Syafie kerana banyak menyebut dan mendedahkan dalil-dalil, hujah-hujah dan pendapat-pendapat ulama lain secara terbuka dan meluas yang turut disertai dengan perbandingannya sekali. Pada akhirnya, mereka diajar untuk memilih dan memutuskan apakah hukum yang paling tepat dan betul dengan meneliti nas-nas dan pandangan-pandangan ulama'. Kemudian mereka diberi peluang untuk memilih mana-mana hukum yang lebih baik dan diyakini mereka.

---

Justeru berbezanya latar belakang, budaya dan sistem pengajian, apabila mereka bertemu sesuatu daerah, jajahan, bandar atau tanah mereka sendiri setelah mereka pulang dari luar negara, maka kadang-kadang berlakulah perbezaan pendapat dan pandangan dalam sesuatu hukum. Sebenarnya, perbezaan pendapat ini tidak akan menjadi masalah sekiranya ia tidak dicampurkan dengan kepentingan peribadi dan perasaan ta'sub kepada pandangan-pandangan tertentu yang boleh diselesaikan secara sihat dan ilmiah melalui muzakarah dan perbincangan. Kedua-dua belah pihak mestilah diberi peluang untuk mengutarakan dalil-dalil dan hujah-hujah dengan berpandukan kitab-kitab yang menjadi pegangan mereka.

Mereka boleh mengkaji di mana dan apakah pun berlakunya sesuatu perbezaan terhadap sesuatu masalah feqah tersebut. Muzakarah dan perbincangan ilmiah yang sebegini boleh dilakukan hanya di kalangan mereka yang berkebolehan dan berkeahlian sahaja. Orang-orang awam tidak sepatutnya dilibatkan kerana mereka tidak faham dan berkeupayaan dari sudut bahasa dan penguasaan ilmu. Kalau mereka terlibat sama, perbalahan akan lebih mudah tercetus dan

---

sukar untuk dikawal. Sekiranya berlaku perbalahan (Na'uzubillah) antara dua golongan iaitu golongan tua dan golongan muda dan di antara dua pusat pengajian golongan ini, ia akan berakhir dengan kerugian besar kepada umat Islam. Tidak kira siapakah yang menang dan siapakah yang kalah tetapi yang jelas, umat Islam semuanya, akan rugi. Seperti kata pepatah Melayu, **“Yang menang menjadi arang, yang kalah menjadi abu”**. Sikap yang terbaik untuk dijadikan pendirian ialah sebagaimana sabda Rasulullah S.A.W. yang bermaksud: **“Perselisihan di kalangan para ilmunan umatku adalah suatu rahmat”**.

Berdasarkan kepada Hadis tadi, umat Islam mesti meyakini bahawa berlakunya perselisihan pendapat dan pandangan di kalangan orang yang berilmu adalah suatu rahmat kepada para pengikutnya kerana dengan adanya perselisihan dan pandangan yang berbeza ini membuka ruang untuk mereka memilih mana yang mereka suka untuk diamalkan dalam kehidupan mereka.

8. Perselisihan pendapat di kalangan ulama' janganlah dianggap sebagai satu perbalahan yang boleh melemahkan umat Islam. Sebagai ulama', mereka perlu menunjukkan sikap tolak ansur yang tinggi sebagaimana yang telah ditonjolkan oleh Imam Hanafi dan sahabat-sahabatnya, Imam

---

Syafi'e dan ulama'-ulama' yang hidup sezaman dengan mereka. Untuk tujuan tersebut, para ulama' dikehendaki menjaga adab-adab berbeza pendapat dan menjaga lidah masing-masing dari mengeluarkan kata-kata yang boleh menyinggung hati dan perasaan sesama kita. Sikap hormat-menghormati sesama ulama' perlu diteruskan dan jangan sekali-kali kita mengkritik dan merendahkan peribadi sesama sendiri. Dengan demikian, Insyallah segala perbezaan yang timbul tidak menjadi racun yang merosakkan umat Islam sebaliknya akan menjadi baja yang menyuburkan. Semoga Allah dapat melembutkan dan menjinakkan hati-hati umat Islam di seluruh dunia.

## 10. IBADAHNYA

Dari Imam Al-Imam Al-Rabi' bin Sulaiman, katanya: "Sesungguhnya Imam Syafi'e mengkhatamkan Al-Quran sebanyak 30 kali dalam satu bulan, bahkan pada bulan Ramadhan, beliau mengkhatamkan Al-Quran sebanyak 60 kali, selain yang beliau baca di waktu sembahyang."

Dalam riwayat lain disebutkan: "Beliau mengkhatamkan Al-Quran sebanyak 60 kali dalam bulan Ramadhan, satu kali di siang hari dan satu kali di malam hari".

Pada suatu ketika, beberapa ulama Mesir telah datang menemui beliau secara sembunyi-sembunyi. Di saat itu beliau sedang membaca Al-Quran.. Kemudian beliau berkata dengan nada bertanya: "Kalian hanya disibukkan dengan permasalahan-permasalahan Feqah, sementara Al-Quran kalian tingalkan?. Ketahuilah! Sesungguhnya aku senantiasa melakukan sembahyang pada waktu malam dan juga membaca Al-Quran, apabila aku membuka Al-Quran dan membaca maka aku tidak akan menutupnya kecuali bila tiba waktu Subuh."

Imam Syafi'e membahagikan malam untuk dirinya kepada tiga bahagian. Sepertiga pertama untuk menulis, sepertiga kedua untuk sembahyang dan sepertiga terakhir untuk tidur dan beristirahat. Diriwayatkan pula dari Bakar bin Nasr, beliau berkata: "Sungguh tidak pernah aku temui di zaman Imam Syafi'e orang yang paling taqwa dan paling wara' daripada beliau dan tidak ada seorang pun yang lebih indah suaranya dalam membaca Al-Quran selain beliau."<sup>24</sup>

---

## ULASAN

- <sup>24</sup> 1. Imam Al-Rabi' berkata: "Banyak kali juga saya bermalam di rumah Imam Syafi'e. Saya dapati pada setiap malam beliau hanya tidur untuk sekejap sahaja."

- 
2. Imam Husain Al-Karabisi berkata: "Saya telah tidur bersama Imam Syafi'e 80 malam. Setiap malam saya dapati beliau akan menggunakan satu pertiga malamnya untuk sembahyang: Apabila sembahyang, beliau akan membaca Al-Quran setiap raka'at tidak kurang dari 50 ayat, paling panjangpun tidak lebih dari 100 ayat. Apabila terbaca ayat rahmat, beliau akan memohon daripada Allah S.W.T agar melimpahkan rahmatNya untuk dirinya dan orang mukmin sekaliannya dan apabila terbaca ayat azab beliau akan memohon perlindungan dari azab Allah untuk dirinya dan sekalian orang mukmin. Seolah-olah beliau telah menghimpunkan untuk dirinya harapan dan kegerunan terhadap Allah S.W.T."
  3. Imam Harmalah bin Yahya berkata: "Saya dengar Imam Syafi'e berkata: "Selama hidup saya, tidak pernah saya bersumpah dengan nama Allah sama ada untuk membenarkan sesuatu atau menidakkannya."
  4. Imam Harmalah bin Yahya meriwayatkan bahawa Imam Syafi'e pernah berkata: "Saya tidak pernah meninggalkan mandi sunat pagi Jumaat sama ada pada musim sejuk lebih-lebih lagi musim panas"
  5. Imam Al-Rabi' berkata: "Saya dengar Imam Syafie

## 11. SIFAT DERMAWANNYA

1. Suatu ketika beliau pergi ke Makkah dari Sana'a dengan membawa sebuah kantung wang yang berisi 10,000 dinar emas (Rp. 4 Milyar). Setibanya di sana, beliau telah mendirikan sebuah khemah di luar Makkah untuk membahagi-bahagikan wang tersebut. Tidak lama kemudian, orang ramai pun datanglah berduyun-duyun kepada Imam Syafi'e dan beliau telah membahagi-bahagikan semua wang tersebut sehingga tidak berbaki walau satu dinar pun.
2. Suatu hari, seseorang telah mengambil kenderaan Imam Syafi'e, lalu beliau berkata kepada Imam Al-Rabi': "Ya Rabi', tolong kamu berikan kepada orang itu wang sebanyak 4 dinar (Rp. 1,600.000) dan katakan kepadanya: "Maaf saudara! Hanya ini saja yang dapat saya berikan untuk kamu."

---

berkata: "Saya tidak pernah kenyang dalam tempoh 17 tahun melainkan sekali sahaja dan di saat itu saya telah memasukkan tangan ke dalam mulut saya dan kemudian semua makananpun berhemburan keluar dari perut saya." Imam Baihaqi telah mengulas pendirian dan sikap Imam Syafi'e tersebut dengan katanya: "Ini kerana kenyang boleh mengeraskan hati, menutup sebahagian kepintaran yang ada pada akal dan menimbulkan rasa malas untuk beribadat kepada Allah S.W.T. Oleh itu, para ahli hakikat memasukkan kenyang dalam sifat tercela dan sedaya upaya berusaha menjauhkan diri daripadanya."

3. Suatu ketika, Imam Syafi'e telah mengenderai keldainya melewati sebuah pasar sepatu. Tiba-tiba cemetinya telah terjatuh dari tangan beliau dan dengan serta merta ianya disambar oleh seorang anak kecil yang kemudiannya telah membersihkan cemeti tersebut dengan menyapukannya ke jubahnya. Selepas itu, anak kecil tersebut telah menyerahkan cemeti itu kepada beliau. Melihat perlakuan baik anak kecil itu, Imam Syafi'e lalu berkata kepada pembantunya: "Berikan semua wang dinar yang ada padamu kepada anak kecil itu." Berkata Imam Al-Rabi': "Saya tidak pasti berapa banyakkah jumlah wang tersebut, tetapi ianya sama ada 8 dinar atau 9 dinar (Rp. 3,600,000).
4. Imam Syafi'e pernah memberikan kepada orang yang memperbaiki sandalnya sebanyak 7 dinar (Rp. 2,800,000).
5. Suatu ketika Imam Syafi'e memanggil seorang tukang cukur untuk mencukur rambut beliau. Setelah selesai bercukur, beliau telah memberi upah wang sebanyak 50 Dinar dan pada riwayat lainnya pula, 80 Dinar.
6. Suatu ketika Imam Al-Humaidi berkata: "Mana mungkin boleh dibandingkan antara sifat dermawan orang-orang Yaman dengan sifat dermawan Imam Syafi'e. Orang-orang Yaman, walaupun mereka mempunyai lebihan wang tertentu, tetapi mereka menghadkan jumlah wang tersebut untuk didermakan, berlainan dengan Imam Syafi'e kerana beliau mendermakan kesemua hartanya."
7. Imam Al-Rabi' berkata: "Kami telah banyak mendengar cerita tentang sifat dermawan orang-orang Mesir, namun kami tidak pernah menemui orang yang sepemurah Imam Syafi'e, bahkan kami tidak pernah mendengar seorang pun yang pemurah di zaman ini seperti beliau.

## 12. MAJLIS ILMUNYA

Selepas selesai sahaja sembahyang Subuh, Imam Syafi'e terus duduk di majlis halaqat ilmunya. Pada permulaanya, beliau akan didatangi ulama' Al-Quran untuk belajar Qiraat Al-Quran sehingga terbit matahari. Selepas itu beliau akan didatangi pula ulama'-ulama' Hadits. Mereka belajar tentang makna dan kandungan Hadits sehingga waktu Dhuha. Setelah itu majlis dilanjutkan lagi dalam bentuk perbincangan dan diskusi di antara Imam Syafi'e dengan anak-anak muridnya berhubung dengan permasalahan hukum-hukum feqah sehingga waktu Dhuha. Kemudian majlis disambung lagi dengan pengajaran Bahasa Arab, Nahwu, 'Arudh dan Syair sehinggalah majlis bersurai pada waktu tengah hari. Demikianlah yang Imam Syafi'e lakukan pada majlis ilmunya setiap hari.<sup>25</sup>

---

## ULASAN

### <sup>25</sup> Nasihat-Nasihat Imam Syafi'e Dalam Belajar

Berikut ialah kata-kata nasihat Imam Syafi'e yang berupa dorongan, galakan dan panduan untuk para penuntut ilmu pengetahuan.

1. "Menuntut ilmu lebih afdhal dari sembahyang sunat"
2. "Wahai Rabi', tuntutlah ilmu walaupun di negeri China"
3. "Sesiapa inginkan dunia maka hendaklah ia berilmu dan sesiapa yang inginkan akhirat maka hendaklah juga ia berilmu"
4. "Ilmu tidak sesuai dituntut melainkan bagi orang yang bankrap"

- 
5. “ Saya hidup selama 16 tahun berlapar dengan hanya memakan roti lembut dan buah tamar. Itupun hanya sekadar membolehkan tubuh saya berfungsi. Bila ditanya: “Apakah tujuan tuan berbuat demikian” Jawabnya: “Saya berbuat demikian semata-mata untuk memudahkan saya menghafaz segala ilmu terutama ilmu Feqah. Saya lakukan semuanya kerana Allah. Semoga Allah menggantikannya untuk saya selepas ini.”
  6. “ Belajarlah kamu sebelum kamu memimpin kerana apabila kamu telah memimpin maka kamu tidak akan berpeluang lagi untuk belajar.”
  7. “ Perhiasan paling berharga bagi seorang ulama’ ialah kemiskinan, bersifat Qana’ah dan merasa redha dengan keduanya”
  8. “Kemiskinan bagi ulama’ ialah kemiskinan yang dicari dan kemiskinan yang menimpa orang jahil ialah kemiskinan yang tidak dapat dielakkan”
  9. “Saya pernah bankrap sebanyak tiga kali. Di saat itu saya hanya makan ikan dan buah tamar sahaja.”

### 13. KERAMATNYA

Suatu ketika beliau berkata kepada Imam Al-Rabi': "Anda adalah perawi kitab-kitabku". Setelah Imam Syafi'e wafat, Imam Al-Rabi' terus hidup sehingga berumur lebih kurang 70 tahun. Melalui Imam Al-Rabi', kitab-kitab Imam Syafi'e telah tersebar ke seluruh penjuru dunia.

Suatu hari, Imam Muhammad bin Hamdan bin Sofyan At-Turaiti Al-Baghdadi berkata: "Saya pernah menghadiri majlis ilmu Imam Al-Rabi' bin Sulaiman. Saya dapati halaman rumah beliau telah dipenuhi 700 buah kenderaan, yang kesemuanya itu hadir semata-mata untuk mendengar periwayatan Imam Al-Rabi' dari apa yang beliau terima daripada Imam Syafi'e".

Imam Al-Rabi' berkata: "Suatu ketika, saya bersama-sama Al-Buwaithi, Al-Muzani dan Muhammad bin Abdullah bin Abdul Hakam telah menziarahi Imam Syafi'e di saat kewafatannya. Imam Syafi'e memandang sejenak kepada kami lalu berkata: "Kamu wahai Abu Ya'qub (Al-Buwaithi) akan mati dalam sel tahanan. Kamu pula wahai Al-Muzani akan hidup di Mesir dengan mengalami cubaan-cubaan berat dan kamu akan dapati suatu masa nanti bahawa kamulah orang yang paling faqih. Adapun kamu wahai Muhammad, akan kembali kepada mazhab ayah kamu (Abdullah bin Abdul Hakam) iaitu mazhab Imam Malik, sedangkan kamu wahai Al-Rabi' merupakan orang yang paling berjasa kepadaku dalam menyebarkan kitab-kitabku. Berdirilah kamu wahai Abu Ya'qub. Terimalah amanahku ini iaitu teruskan majlis halaqat ilmuku sebagai ganti diriku". Kata Imam Al-Rabi': "Maka terjadilah kepada kami semua sebagaimana yang beliau katakan."

### 14. LAQAB

Imam Syafi'e memiliki laqab atau julukan yang sangat banyak

sekali, di antaranya:

- Al-Imam Al-'Alim Habr Al-Ummah
- Naasir Al-Sunnah
- Al-Imam Al-A'imah dalam keilmuan, wara', zuhud, ma'rifah dan kepintaran
- Habrul Ummah dan Sulthan Al-A'imah
- Faqih Al-'Asr
- Penyebar ilmu ke Barat dan Timur
- Al-Imam Al-Kabir, Al-Jalil Al-Hadzir
- Al-Muttabi' Li Al-Sunnah Wa Al-Atsar
- Al-Muqtadi dengan apa yang terhimpun atasnya orang-orang Muhajirin dan Anshar
- Penerang segala kegelapan
- Penghulu Fuqaha'

## **15. PUJIAN PARA ULAMA UNTUK IMAM SYAFI'E**

- 1) Ishaq Ibnu Rahawaih berkata: "Imam Ibnu Hambal menyatakan kepada beliau semasa beliau berada di Makkah, "Akan saya tunjukkan kepadamu seseorang yang belum pernah kamu temui ada orang yang seperti dia", kemudian beliau membawa saya menghadap Imam Syafi'e.
- 2) Abu Tsaur berkata: "Saya tidak pernah melihat ada orang yang seperti Imam Syafi'e dan dia sendiri tidak pernah melihat ada orang yang seperti dia".
- 3) Ahmad bin Hambal berkata: "Tidak ada seorangpun yang pernah memegang tinta atau pena melainkan dia akan merasa terhutang budi terhadap jasa baik Imam Syafi'e"
- 4) Abu Daud berkata: "Saya tidak pernah menerima riwayat (Hadis) yang salah dari Imam Syafi'e".
- 5) Asnawi berkata: "Ulama bersepakat menyatakan bahawa Imam Syafi'elah orang yang mula-mula sekali mengarang dalam bidang ilmu usul feqah, orang yang pertama sekali mencetuskan idea tentang adanya nasikh dan mansukh dan

beliaulah orang yang paling awal mengarang bab-bab feqah yang masyhur”.

- 6) Abu Nuim dalam kitabnya *Hilyatul Awlia'* berkata: “Imam Syafi'e adalah orang yang paling berpegang teguh dengan atsar-atsar dan sunnah dan sangat pandai dalam mengistinbatkan hukum-hukum dan berbagai-bagai masalah Feqah. Beliau juga mempunyai buah fikiran yang bernas di dalam menyelesaikan masalah-masalah qias yang berlandaskan kaedah-kaedah usul, dan berfikiran bijaksana di dalam menangani masalah-masalah yang menjadi perselisihan pendapat di kalangan para ulama'.
- 7) Pada suatu hari Ibnu Uyainah meriwayatkan sebuah hadis yang raiq (menyentuh perasaan). Tiba-tiba Imam Syafi'e pengsan mendengarnya. Seseorang berkata kepada Ibnu Uyainah: “Wahai Abu Muhammad, Muhammad Ibnu Idris (Imam Syafi'e) telah wafat, maka Ibnu Uyainah pun berkata: “Kalau memang Muhammad Ibnu Idris telah wafat bererti telah wafatlah orang yang terbaik di zamannya”.
- 8) Humaidi berkata: “Kami ingin sekali berdebat dan menolak pendapat-pendapat para ahli qiyas. Tetapi kami tidak mampu berbuat demikian, sehinggalah kami dikunjungi Imam Syafi'e, maka beliaulah yang membuka jalan ke arah itu”.
- 9) Abu Ubaid berkata: “Saya tidak pernah melihat ada orang yang lebih fasih, lebih pintar dan lebih wara' dari Imam Syafi'e”.
- 10) Abu Hatim berkata: “Imam Syafi'e adalah orang yang sangat mengetahui tentang kesihatan badan dan orang yang paling jujur dalam pembicaraan”.
- 11) Imam besar Ibnu Ishak Ibnu Huzaimah ditanya: “Apakah ada Hadis yang tidak sampai kepada Imam Syafi'e”. Beliau menjawab: “Tidak”. Ibnu Katsir berkata: “Itu bermaksud bahawa, kadangkala Hadis sampai kepada beliau dengan

sanad-sanadnya dan kadangkala diriwayatkan secara mursal dan kadangkala pula diriwayatkan secara terputus sanad, sebagaimana yang terdapat dalam kitab-kitab beliau”.

12) Daud Adzahiri mengatakan dalam kitabnya “Jam’u Fi Fadhaa’il Al-Syafi’e”: “Tentang manakib Imam Syafi’e, Imam Syafi’e mempunyai kelebihan yang tidak dimiliki oleh orang lain, baik dari segi kemuliaan nasabnya, kekuatan dan kebersihan agama dan I’tikadnya, sifat pemurahnya, ketinggian ilmunya terhadap kesahihan dan kedhoifan Hadis, nasikh dan mansukh, hafalan Al-Qurañ dan Hadis mahupun dari sudut sejarah kehidupannya sebagai salah seorang dari para Imam mujtahid. Beliau juga mempunyai karangan-karangan yang berharga dan mempunyai ramai teman dan murid yang baik seperti Imam Ahmad bin Hambal yang masyhur dengan kezuhudannya, kewarakannya dan kegigihannya dalam menegakkan sunnah. Imam Syafi’e adalah orang yang paling mengetahui tentang makna-makna Al-Qurañ dan Hadis, paling berkemampuan menunjukkan dalil-dalil dari Al-Qurañ dan Hadis dan orang yang paling betul tujuan dan keikhlasannya”.

13) Al-Muzani berkata: “Saya telah membaca kitab Al-Risalah sebanyak lima ratus kali dan setiap kali saya membacanya, saya akan mendapat faedah (istinbat) yang baru”. Dalam satu riwayat, beliau juga menyatakan: “Saya telah mempelajari kitab Al-Risalah semenjak lima puluh tahun yang lalu, tidak pernah sekalipun saya membacanya kecuali saya akan mendapat ilmu yang belum pernah saya ketahui sebelum ini”.

Kitab Al-Risalah adalah sebuah kitab usul feqah pertama yang ditulis oleh Imam Syafi’e. Ianya ditulis atas permintaan Imam Abdul Rahman Ibnu Mahdi. Imam Abdul Rahman dan Imam Yahya Ibnu Said Al Qathan sangat mengkaguminya.

14) Ahmad bin Hambal berkata: “Kalau saya ditanya tentang

sesuatu masalah yang saya tidak mengetahui jawabannya, saya akan menjawabnya dengan apa yang dikatakan oleh Imam Syafi'e kerana dia adalah Imam yang alim daripada bangsa Quraisy".

- 15) Yunus bin Abdi A'la berkata: "Imam Syafi'e adalah orang yang paling cerdik, kalau kecerdikan manusia dikumpulkan kesemuanya dan kemudian dibandingkan dengan kecerdikan Imam Syafi'e, nescaya kecerdikan semua manusia akan tenggelam. Tidak pernah Imam Syafi'e mengajar sesuatu melainkan kamu akan mengatakan: "Itu memang bidangnya." dan apabila beliau berbicara tentang syair dan ilmu pengetahuan mengenai bahasa kamu akan mengkaguminya dan berkata: "Itu memang bidangnya". Begitu juga kalau dia menulis mengenai sejarah bangsa Arab, kamu akan mengatakan: "Itu juga memang bidangnya". Kalau beliau berdebat dengan seseorang, beliau akan berterusan berdebat sehingga orang tersebut kehabisan hujahnya dan kemudian dia akan mengatakan kepadanya: "Sekarang kamu mengakui pendapat saya dan saya pun mengakui pendapat kamu". Kemudian orang tersebut bertaklid kepadanya dan dia terus mendebat orang tersebut sehingga ianya tidak mampu berhujah lagi."
- 16) Muhammad Ibnu Hassan berkata: "Kalau saya mengikuti kamu, saya tidak akan kuat, tetapi kalau saya berselisih pendapat dengan kamu, saya tidak akan mampu berhujah untuk melawan pendapatmu".
- 17) Hassan bin Muhammad Al-Jitaran berkata: "Sentiasalah ulama'-ulama' Hadis dan hukum dalam keadaan tidur nyenyak (tidak mengistinbatkan hukum) sehinggalah mereka dibangunkan oleh Imam Syafi'e".
- 18) Ibrahim Al-Harbi berkata: "Setibanya Imam Syafi'e di kota Baghdad, terdapat 20 halaqah pengajian ulama' ahli Qias di sebelah beranda masjid Jami,' namun pada Jumaat berikutnya setelah beliau memulakan majlis halaqah ilmunya

hanya tinggal tiga atau empat halaqah sahaja yang masih mampu bertahan”.

## 16. WAFAT

Imam Al-Rabi' berkata: “Imam Syafi'e wafat pada malam Jumaat selepas solat Maghrib dan saat itu saya berada di sisinya.<sup>26</sup> Beliau dimakamkan pada hari Jumaat selepas solat Asar hari terakhir bulan Rejab tahun 204 Hijrah. Kubur beliau terdapat di Kota Mesir.<sup>27</sup> Beliau telah memperolehi kebesaran dan kemuliaan sesuai dengan kedudukan beliau sebagai seorang Imam Mazhab. Al-Imam Al-Rabi' berkata: “aku bermimpi dalam tidurku melihat Nabi Adam AS wafat. Kemudian aku bertanya Imam Syafi'e mengenai ta'bir mimpi tersebut. Beliau menjawab: “Ini petanda bahawa seorang yang paling alim di muka bumi ini akan wafat kerana Allah SWT telah mengajarkan nama-nama benda kepada Nabi Adam AS. Tidak berapa lama kemudian wafatlah Imam Syafi'e”.

Seseorang yang lain pula bermimpi pada malam wafatnya Imam Syafi'e, bahawa dia berjumpa dengan seseorang yang berkata: “Pada malam yang seperti inilah wafatnya Rasulullah.”

---

## ULASAN

- <sup>26</sup> 1. Mengikut riwayat dari Imam Baihaqi, kesibukan Imam Syafi'e menyebarkan ilmu pengetahuan tanpa mengira penat dan lelah dan tanpa rehat yang secukupnya menyebabkan beliau telah ditimpa penyakit buasir. Penyakit inilah yang menjadi punca kematian Imam Syafi'e setelah beliau mengalami kekurangan darah ekor

---

banyaknya darah yang keluar kesan daripada penyakit buasir ini. – Ibid.

2. Mengikut sesetengah riwayat lain pula, beliau mati akibat dipukul oleh seorang ulama' mazhab Maliki yang bimbangkan kepupusan pengikut mazhab Maliki kerana Imam Syafi'e. – Mughni Muhtaj Li Khatib Al-Syarbini, Sirah Imam Syafie oleh Dr. Wan Abdul Qadir Wan Ahmad.

## ULASAN

- <sup>27</sup> 1. Mengikut sesetengah riwayat beliau wafat di rumah sahabatnya Imam Abdullah bin Abdul Hakam dan pengurusan jenazahnya telah dilakukan oleh anak-anak Imam Abdullah dengan bantuan murid-muridnya.
2. Mengikut satu riwayat, Imam Syafi'e telah meninggalkan wasiat kepada Imam Al-Rabi' yang sering menziarahinya ketika beliau sakit supaya meminta Gabenor Mesir, Abbas bin Musa, datang memandikan jenazahnya. Gabenor Abbas pun datang dan beliau memahami erti sebenar wasiat Imam Syafi'e itu. Beliau pun bertanya kepada keluarga Imam Syafi'e apakah beliau mempunyai tanggungan atau hutang yang belum dijelaskan. Mereka menjawab bahawa Imam Syafi'e memang masih mempunyai sedikit hutang. Gabenor pun

---

hutang-hutang tersebut. Beliau menjelaskan bahawa itulah maksud sebenar Imam Syafi'e meminta beliau datang memandikan jenazahnya.

3. Menurut setengah riwayat, jenazah Imam Syafi'e telah dikebumikan di tanah perkuburan bani Zuhraf yang oleh anak-anak keluarga Abdul Hakam yang terletak di sebelah barat Al-Khandak dan di kaki bukit Al-Muqattam.

lalu mengarahkan pegawainya supaya menjelaskan

## 17. PETIKAN DARI KEHIDUPAN DAN MANAQIB IMAM SYAFI'E

- 1) Imam Ahmad bin Hambal berkata : "Dia senantiasa mendoakan kebaikan untuk Imam Syafi'e dalam sembahyangnya selama 40 tahun." Imam Ahmad dalam ulasanya mengenai satu hadis yang diriwayatkan oleh Abu Daud dari Abu Hurairah R.A bahawa Rasulullah S.A.W. bersabda: "Tiap-tiap seratus tahun (1 abad) Allah akan mengutuskan seorang yang memperbaharui urusan agamanya untuk umat ini (Islam)." berkata: "Umar bin Abd. Azizlah yang diutuskan oleh Allah pada abad pertama dan Imam Syafi'e pada abad kedua."
- 2) Imam Abu Nua'im bin Abd Malik bin Muhammad Al-Asfirayini berkata: "Hadis Ibnu Masud yang telah diriwayatkan oleh Abu Daud dan Al-Hakim yang berbunyi: "Jangan kalian mencela orang Quraisy, kerana ilmu seorang ulama'nya akan memenuhi pelusuk dunia.", tidaklah sesuai ditujukan kepada sesiapa pun melainkan hanya kepada Imam Muhammad bin Idris Al-Syafi'e Al-Quraisy saja. Ini kerana setiap individu ulama Quraisy yang lain, baik dari kalangan sahabat, tabi'in dan seterusnya, ilmu mereka sekalipun nampak muncul dan juga tersebar tetapi tidaklah sampai ke tahap yang dikehendaki dalam hadis tersebut (memenuhi pelusuk bumi). Mereka hanya menguasai beberapa bidang ilmu saja Walaupun mereka memang tergolong dalam kalangan ahli fatwa, namun kaahlian mereka tidak begitu jelas, tidak sampai memenuhi pelusuk muka bumi. Keilmuan mereka tidak melebihi keilmuan yang lainnya, sehingga tidak boleh digolongkan seperti yang dimaksudkan dalam hadis tersebut. Adapun Imam Syafi'e,

beliau telah mengarang beberapa kitab, menguasai semua bidang ilmu, telah mensyarahkan usul dan furu'. Beliau dikenali dari sejumlah karangan dan syarahan yang telah beliau tulis dan Allah SWT telah memberikan ilmu yang banyak melewati lidah beliau. Kata-kata beliau selalu terngiang-ngiang di telinga pendengarnya, selalu diingati dalam hati. Justeru itu semakin hari orang akan menjadi bertambah baik dan kefahaman mereka semakin jelas. Oleh itu, bolehlah kita simpulkan bahawa seluruh ahli ta'wil ketika mana mentafsirkan Hadis Rasulullah tersebut sepakat menyatakan bahawa orang Quraisy yang dimaksudkan dalam Hadis itu ialah Imam Syafi'e. Ini kerana ilmu beliau telah tersebar luas ke seluruh penjuru bumi, kitab-kitab beliau ditulis dan dicetak berulang kali sebagaimana telah dicetaknya Al Quran. Semua kitab-kitab beliau telah dipelajari oleh para ulama' dan pelajar. Tidak terhitung banyaknya majlis ta'lim dan sekolah yang telah mempelajari kitab-kitab beliau sehingga jadilah kitab-kitab beliau sebagai Imam (bahan rujukan). Pendapat dan pemikiran beliau telah diterapkan dan diguna pakai dalam Dewan Hakim, Majlis Qurra', pemerintahan dan tempat-tempat lainnya."

- 3) Abu Hassan Ali bin Ahmad Al-Dainuri seorang zuhud di kota Makkah berkata: "Aku bermimpi berjumpa Rasulullah S.A.W. dan akupun bertanya: "Wahai Rasulullah, pendapat siapakah yang patut ku pegang?" Kemudian Amirul Mu'minin Ali R.A memberi isyarat kepada ku seraya berkata: "Ambillah pendapat dia ini (Imam Syafi'e) kerana dia anak paman kami Al-Syafi'e. Jika kamu mengamalkan dengan mazhab/pendapatnya, kamu akan mendapat petunjuk dan kamu akan sampai ke syurga." Kemudian Beliau mengulas: "Imam Syafi'e di tengah-tengah ulama bagaikan bulan purnama di tengah-tengah bintang berkilauan."

- 4) Muhammad Ibnu binti Al-Syafi'e (cucu Imam Syafi'e) berkata: "Sesungguhnya Imam Syafi'e telah mendalami bahasa Arab dan sejarah bangsa Arab selama dua puluh tahun. Beliau berkata: "Tidaklah aku lakukan semua ini melainkan untuk membantuku mendalami ilmu Fiqah."
- 5) Al-Rabi berkata: "Telah datang utusan khalifah kepada Imam Syafi'e di Mesir untuk melantik beliau sebagai Qhadi. Imam Syafi'e lantas berdoa: "Ya Allah, jika sekiranya jawatan ini membawa kebaikan bagi agamaku, kehidupanku dan kesudahanku/akhiratku maka perkenankanlah untukku menjawat jawatan ini tetapi jika sekiranya ia memberikan akibat yang tidak baik bagiku maka matikanlah aku". Beliau meninggal dunia tiga hari selepas kedatangan utusan tersebut dan di saat kematian Imam Syafi'e, utusan khalifah masih berada di rumah beliau."
- 6) Mahfuz bin Abu Tambali berkata: "Saya mendengar Imam Syafi'e berkata: "Mereka mengatakan bahawa saya menentang bapa sipulan kerana perkara dunia. Bagaimana mungkin saya berbuat demikian sedangkan dunia itu milik mereka, sesungguhnya manusia menginginkan dunia ini hanya untuk memenuhi selera perut dan memuaskan hawa nafsunya sahaja, sedangkan saya telah dilarang untuk menjamu selera dengan makanan dan saya tidak ada kemampuan dan keinginan untuk berkahwin. Akan tetapi saya menentanginya kerana pendapat-pendapatnya menyalahi sunnah-sunnah Rasulullah S.A.W."
- 7) Bisyr Al-Marisy di saat kembalinya dari melaksanakan ibadah haji, dikatakan kepada beliau "Siapakah yang kamu jumpa semasa di kota Makkah.", beliau menjawab: "Aku

telah berjumpa dengan seorang lelaki yang kalau dia berada bersama kita nescaya kita tidak akan dikalahkan oleh sesiapa pun tetapi kalau dia bersama-sama musuh kita, maka bersiaplah dan berwaspadalah untuk melawannya. Lelaki itu adalah Muhammad bin Idris Al-Syafi'e."

8) Abdul Rahman bin Mahdi berkata: "Tidak ada satu salat pun yang aku kerjakan, kecuali aku berdo'a untuk Imam Syafi'e pada shalat tersebut." (Abdul Rahman bin Mahdi adalah salah seorang yang mahir dalam Ilmu Hadis). Berkata Ali Ibnu Al-Mahdi: "Demi Allah, jika sendainya aku diperintahkan untuk bersumpah di antara Rukun dan Maqam, nescaya aku akan bersumpah, bahawa aku tidak pernah berjumpa dengan orang yang lebih hebat dalam bidang Hadis selain dari Abdul Rahman bin Mahdi".

9) Yahya bin Said pernah berkata : "Aku selalu mendo'akan untuk Imam Syafi'e dalam setiap shalatku sejak empat puluh tahun yang lalu."

10) Al-Rabi' bin Sulaiman berkata: "Aku pernah mendengar Imam Syafi'e berkata: "Suatu hari aku bermimpi melihat seseorang datang kepadaku. Kemudian dia mengambil dan membawa kitab-kitabku seraya melemparkannya ke udara, sehingga terhambur dan berterbangan ke pelbagai penjuru, lalu aku tanyakan kepada ahli ta'wil tentang ta'wil mimpiku ini. Mereka katakan: "Jika seandainya mimpi tuan itu benar nescaya tidak akan tinggal satu negeri Islam pun kecuali di sana akan tersebar ilmu pengetahuan tuan."

11) Imam Jahiz berkata: "Aku sudah menyemak beberapa kitab para cendekiawan pintar tapi tidak ada yang seindah karangan Imam Syafi'e. Seakan-akan apa yang keluar daripada mulutnya adalah untaian mutiara".

- 12) Ishaq bin Rahawaih berkata: "Imam Syafi'e adalah tempat rujukan para ulama".
- 13) Harmalah bin Isya' berkata: "Bapaku mengatakan: "Tulislah semua yang dikatakan oleh Imam Syafi'e". Sedangkan aku mempunyai pembantu yang telah digajikan oleh orang tuaku. Bapaku juga selalu berkata: "Tulislah apa yang dikatakannya".
- 14) Ahmad Ibnu Sinan berkata: "Seandainya bukan kerana Imam Syafi'e, Islam akan lenyap".
- 15) Qahzaan bin Abdullah berkata: "Aku tidak pernah melihat seorang pun daripada para ulama yang lebih berwibawa di mata orang jauh selain Imam Syafi'e dan tidak ada yang paling ramah dan pemurah di mata orang dekat selain Imam Syafi'e".
- 16) Muhammad bin Muslim bin Warah berkata: "Ketika Abu Zur'ah Al Razie wafat, aku melihatnya dalam mimpi. Aku bertanya kepadanya: "Apa yang dilakukan Allah terhadap dirimu". Dia menjawab: "Allah berkata kepadaku: "Ikut sertakan dia dengan Abu Abdillah dengan Abu Abdillah, dengan Abu Abdillah".
- 17) Dari Ahmad bin Salamah Al-Naisabury berkata: "Telah berkahwin Ishaq bin Rahawaih di Marwa dengan seorang perempuan janda, di mana suaminya terdahulu mempunyai kitab-kitab Imam Syafi'e. Sebenarnya beliau tidak menikahi perempuan tersebut melainkan semata-mata untuk mendapatkan kitab-kitab Imam Syafi'e".
- 18) Muhammad bin Nashar Al-Tirmidzi berkata: "Aku telah

menulis Hadis selama 27 tahun dan aku juga telah mendengar pendapat dan pemikiran Imam Malik. Pada waktu itu, aku tidak pernah menaruh perhatian terhadap pendapat dan pemikiran Imam Syafi'e. Ketika aku berada di masjid Rasulullah S.A.W. di Madinah dan tertidur di sana, aku bermimpi bertemu Nabi S.A.W., lalu aku berkata: "Ya Rasulullah, aku akan menulis pendapat Abi Fulan". Baginda menjawab: "Jangan!". Aku berkata lagi: "Bagaimana dengan pendapat Imam Malik?" Rasulullah S.A.W. menjawab: "Tulislah darinya yang sesuai dengan HadisKu". Seterusnya aku bertanya lagi: "Bagaimana kalau aku menulis pendapat Imam Syafi'e?". Nabi kelihatan mengangguk-anggukkan kepalanya seperti marah, kemudian mengangkat kepalanya dan memandang kepadaku seraya berkata: "Menurut pandanganmu, ini adalah suatu pendapat? Tahukah kamu, ini bukan sebarang pendapat, ini adalah sanggahan terhadap orang-orang yang menyalahi sunnahKu". Muhammad bin Nashar At Tirmidzi berkata: "Setelah mimpi itu, aku pun pergi ke Mesir kerana ingin menulis kitab-kitab Imam Syafi'e".

- 19) Muhammad Ibnu Ali Al-Madany berkata: "Orang tuaku berkata: "Tulislah semua kata-kata Imam Syafi'e. Jangan engkau tinggalkan walaupun satu huruf, kerana dalam satu huruf itu terdapat ilmu pengetahuan".
- 20) Saleh bin Ahmad Ibnu Hambal bercerita: "Imam Syafi'e datang kerana menziarahi orang tuaku yang sedang sakit. Seketika orang tuaku bangun dan mencium antara kedua mata Imam Syafi'e dan mempersilakan Imam Syafi'e duduk di tempat beliau. Orang tuaku lalu duduk di hadapan beliau sambil bertanya itu dan ini. Tatkala Imam Syafi'e bangkit berdiri untuk mengendarai tunggangannya, orang tuaku pun

segera bangkit mengambil tali keldai Imam Syafi'e sambil berjalan di samping beliau. Kemudian peristiwa tersebut telah didengari oleh Yahya Ibnu Main lantas beliau berkata setengah menghina: "Subhanallah! Apakah memang harus anda berjalan di samping keldai Syafi'e?" Orang tuaku menjawab: "Barang siapa ingin mendalami Ilmu Feqah, hendaklah ia mencium ekor keldai Imam Syafi'e".

21) Othman bin Harzard Al-Anthai berkata: "Saya melihat dalam mimpi seakan-akan kiamat telah berlaku, seakan-akan Allah swt telah berada di Mahkamah Agung, seakan-akan semua makhluk telah dihalau, seakan-akan telah menyeru seseorang pemanggil dari Arasy': "Masukanlah Abu Abdillah dan Abu Abdillah dan Abu Abdillah dan Abu Abdillah ke dalam syurga". Aku bertanya kepada malaikat yang berada di sisiku: "Siapakah gerakan mereka itu". Malaikat menjawab: "Adapun Abu Abdillah yang pertama adalah Malik Ibnu Anas, yang kedua adalah Sufian Al-Thaury, yang ketiga Imam Syafi'e dan yang keempat adalah Ahmad Ibnu Hambal".

22) Abu Hasan Al-Syafi'e berkata: "Aku telah bermimpi berjumpa Rasulullah S.A.W. Aku bertanya: "Wahai Rasulullah! Ganjaran apa yang seharusnya diberikan kepada Imam Syafi'e terhadap ucapan Salawat dan Salamnya yang terdapat dalam kitab Al-Risalah (Wa Solallahu'ala Muhammad Kullama Zakarahul Zakirin, waghafala'an zikrihil Ghafilun)". Rasulullah menjawab: "Sebagai balasannya, dia dibebaskan dari hisab".

## 18. **KATA-KATA MUTIARA IMAM SYAFI'E**


- Saya tidak berbahas dengan seseorang, sedangkan saya

menghendaki dia itu salah. Setiap ilmu yang ada di dadaku maka aku sangat berkeinginan untuk mengajarkannya kepada setiap orang dan aku tidak mahu ilmu itu dinisbahkan kepadaku.

- Saya tidak berbicara dengan sesiapa pun melainkan saya tidak peduli apakah kebenaran itu Allah nampakkan atas lidah saya atau lidahnya.
- Apabila anda menemui dalam kitab-kitabku tulisan yang menyalahi sunnah Rasulullah S.A.W, maka ambillah yang sesuai dengan Sunnah Rasul dan tinggalkan apa yang saya katakan.
- Apabila anda masuk ke suatu kota dan anda tidak menemui padanya walaupun seorang hakim yang adil, tidak ada air yang mengalir dan tidak ada doktor yang peramah, maka anda jangan tinggal di kota itu.
- Tidak ada suatu amalan pun yang paling mendekatkan dirimu kepada Allah S.W.T. selepas shalat Fardhu yang lebih afdal selain dari menuntut ilmu.
- Barangsiapa tidak menyenangi ilmu bererti tidak akan ada kebaikan pada dirinya. Oleh itu, jangan sampai ada antara anda dan dia saling kenal-mengenal dan menjadi teman.
- Jika Fuqaha' yang beramal dengan ilmu mereka bukar merupakan wali-wali Allah, maka tentulah tidak ada bag Allah S.W.T. seorang wali pun.
- Berkata Abdullah Ibnu Abdul Hakam kepada Imam Syafi'e "Jika kamu bertekad untuk tinggal di sebuah negeri (Mesir) maka hendaklah kamu memiliki makanan yang cukup untuk satu tahun dan kedudukanmu dimuliakan di sisi pemerintah" Lalu Imam Syafi'e menjawab: "Hai Abu Muhammad **sesiapa yang tidak merasa mulia dengan takwa maka tidak ada kemuliaan baginya.** Bahawasanya aku telah dilahirkan di Ghaza dan dibesarkan di Hijaz. Kami sama sekal

tidak memiliki persiapan makanan untuk satu malam pun tetapi kami tidak pernah tidur dalam keadaan lapar”.

- Imam Al-Muzani berkata: “Aku bertanya kepada Imam Syafi’e: “Kenapa anda bertongkat sedangkan anda bukanlah seorang yang lemah”. Imam Syafi’e menjawab: “Aku melakukan semua ini supaya aku selalu ingat bahawa aku adalah seorang musafir yang sedang menuju kepada Allah”.
- Bertemankan seseorang yang tidak ada rasa malu, akan memalukannya di hari kiamat kelak.
- Kamu dilahirkan dalam keadaan merdeka maka teruslah menjadi orang yang merdeka.
- Sebagaimana mata mempunyai batasannya, begitulah dengan akal yang juga memiliki ruang lingkup yang terbatas.
- Kalau aku memuliakan seseorang lebih dari kedudukannya nescaya sebanyak itulah aku akan dihinakannya.
- Sifat pemurah dan dermawan akan menghilangkan keaiban di dunia dan akhirat.



دانتارا علماء ٢٠٠٠ يث تركنل دالم مذهب شافعي سباكيماان برايكوت

بيلاغن	نام - نام	تاهون وفاة هجرية	كاستميوان
١	الإمام الجليل أبو عبدالله أحمد بن محمد بن حنبل ابن هلال بن أسد الشيباني.	٢٤١	فيبيار مذهب قديم. أحمد الأئمة الأربعة
٢	البويطي - الإمام الجليل أبو يعقوب يوسف ابن يحي البويطي المصري	٢٣١	إمام جليل، فقيه عابد ناشر المذهب الجديد
٣	المزني - الإمام الجليل أبو إبراهيم اسماعيل بن يحي ابن اسماعيل المزني.	٢٦٤	ناصر المذهب الشافعي، الجديد مجتهد مطلق
٤	الربيع المرادي - الإمام الجليل أبو حامد الربيع ابن سليمان المرادي المؤذن	٢٧٠	ناشر المذهب الجديد
٥	محمد بن عبدالحكم - أبو عبد الله محمد بن عبد الله بن عبد الحكم	٢٦٨	
٦	أبو ثور - الإمام الجليل أبو ثور إبراهيم بن خالد بن اليمان الكلبي البغدادي	٢٤٠	فقيه محدث. ناشر المذهب القديم
٧	ابن راهويه - الإمام الجليل أبو يعقوب اسحاق ابن إبراهيم بن مخلد الخنظلي المروزي	٢٣٨	فقيه محدث
٨	الإمام الجليل أبو عبيد القاسم بن سلام الأديب الفقيه المحدث	٢٢٤	فقيه محدث اديب
٩	الربيع الجيزي - الربيع سليمان بن داود الجيزي أبو محمد الأزدي.	٢٥٦	ناشر المذهب الجديد
١٠	يونس عبد الأعلى - الإمام الكبير أبو موسى يونس بن عبدالأعلى الصدفي المصري الفقيه المقرئ	٢٦٤	ناشر المذهب الجديد
١١	الإمام أبو نجيب حرمة بن يحي بن عبد الله بن حرمة التجيبي المصري	٢٤٣	امام جليل في الفقه والحديث ناشر المذهب الجديد

٢٤٠	الشيخ أبو عثمان القاضي محمد بن أبي عبد الله محمد بن إدريس - أكبر أولاد الإمام الشافعي	١٢
٢٤٨	الحافظ أبو جعفر الطبري - أحمد بن صالح المصري.	١٣
٢٥٦	الإمام البخاري - أبو عبد الله محمد بن اسماعيل ابن إبراهيم صاحب الجامع الصحيح.	١٤
٢٦٠	الزعفراني - الإمام الجليل أبو علي الحسن ابن محمد الصباح الزعفراني.	١٥
٢٤٧/٢٤٥	إمام جامع بين الفقه والحديث، علم الكلام من رواة القديم	١٦
٢٧٧	الكرابيسي - الإمام الجليل الحسين بن علي ابن يزيد أبو علي الكرابيسي.	١٧
٢٧٧	أبو حاتم الرازي - محمد بن إدريس بن المنزر ابن داود الغطفاني الحنظلي	١٨
٢٨٣	أبو يعقوب الاسفرائيني - اسحاق بن موسى ابن عمران الاسفرائيني.	١٩
٢٨٠	أبو سعيد الدارمي - عثمان بن سعيد بن خالد ابن سعيد السجستاني الحافظ	٢٠
٢٨٨	أبو القاسم الأنطاقي - عثمان بن سعيد بن بشار صاحب المزني والربيع.	٢١
٢٩٣	عبد الله بن محمد بن عيسى الإمام الحافظ أبو عبد الله المروزي الزاهد، إمام أهل الحديث بمر	٢٢
٢٩٤	محمد بن نصر المروزي - الإمام الجليل المجتهد المطلق أبو عبد الله	٢٣
٣٠٢	أبو زرعة الرازي - محمد بن عثمان ابن إبراهيم بن زرعة الثقفي	٢٤
٣٠٥	أبو بكر الفارسي - أحمد بن الحسن بن سهل	

فقيه محدث	٣٠٧	أبو يحيى الساجي - زكريا بن يحيى بن عبد الرحمن البصري	٢٥
إمام مجتهد حافظ	٣١٠ / ٢٠٩	محمد بن ابراهيم بن المنذر - الإمام أبو بكر النيسابوري	٢٦
أحد أئمة المذهب	٣٠٦	أبو الحسن التميمي - منصور بن اسماعيل الفقيه الشاعر الضرير المصري	٢٧
مجتهد مطلق	٣١٠	أبو جعفر الطبري - محمد بن جرير بن يزيد ابن كثير بن غالب أبو جعفر الطبري.	٢٨
مجتهد مطلق	٣١١	أبو بكر ابن خزيمة - محمد بن اسحاق بن خزيمة ابن المغيرة بن صالح بن بكر	٢٩
من أصحاب الوجوه ومن شيوخ الفقهاء الشافعيين	٣٢٨	أبو سعيد الاصطخري - الإمام الجليل الحسن بن أحمد بن يزيد بن عيسى	٣٠
	٣٢٠	أبو علي بن خيران - الحسين بن صالح بن خيران البغدادي أحد أركان المذهب	٣١
صاحب المسند الصحيح	٣١٦ / ٣١٣	أبو عوانة - يعقوب بن اسحاق بن ابراهيم ابن زيد النيسابوري، المحافظ الكبير	٣٢
فقيه الجليل من اصحابها	٣١٠	أبو حفص ابن الوكيل - عمر بن عبد الله ابن موسى	٣٣
	٣٢٤	أبو بكر النيسابوري - عبد الله بن محمد بن زياد الإمام المحافظ الكبير	٣٤
	٣٤٠	أبو اسحاق المروزي - ابراهيم بن أحمد بن اسحاق	٣٥
الفقيه المحدث إمام من الأئمة	٣٨٩	أبو علي السرخسي - زاهر بن أحمد بن محمد ابن عيسى الفقيه المقرئ المحدث	٣٦
إمام في التفسير، الحديث، الكلام أحد الأئمة واللغة -	٣٦٥	القفال الشاشي الكبير - أبو بكر محمد بن علي ابن اسماعيل الإمام الجليل	٣٧

أحد الأئمة	٣٢٤	أبو الحسن البيهقي - محمد بن شعيب بن ابراهيم بن شعيب النيسابوري	٣٨
أحمد عظماء الأصحاب	٣٤٥	أبو علي بن أبي هزيرة - الحسن بن الحسين الإمام الجليل القاضي	٣٩
الإمام المطلق	٣٠٦	ابن سريج - أحمد بن عمر بن سريج القاضي أبو العباس البغدادي	٤٠
أحد أصحاب الوجوه	٣٣٠	أبو بكر الصيرفي - محمد بن عبد الله الإمام الجليل الأصولي	٤١
	٣٨٥	الحافظ الدارقطني - أبو الحسن علي بن عمر ابن أحمد. الدارقطني البغدادي الحافظ المشهور	٤٢
من كبار أئمة الأصحاب	٣٥٩	ابن القطان - أبو الحسين بن محمد بن أحمد البغدادي	٤٣
من أصحاب الوجوه	٣٥٠	أبو علي الطبري - الإمام الجليل الحسين بن القاسم	٤٤
وله وجوه	٣٢٠	محمد الخضري - أبو عبد الله محمد بن أحمد المروزي	٤٥
أحد أئمة المذهب	٣٧٥	أبو القاسم الداركي - عبد العزيز عبد الله ابن محمد الفقيه أحد أئمة المذهب.	٤٦
إمام المتكلمين	٣٢٠	أبو الحسن الأشعري - علي بن اسماعيل بن أبي بشر الشيخ أبو الحسن الأشعري البصري	٤٧
أحد أئمة المذهب	٤٠٠	أبو علي الزجاجي - الحسن بن محمد بن العباس القاضي	٤٨
فقيه أصولي، متكلم وله وجوه	٤١٨	أبو اسحاق الاسفرايني - ابراهيم بن محمد ابن ابراهيم الفقيه المتكلم، الأصولي	٤٩
إمام جليل حافظ المذهب	٤٥٨	أبو عاصم العبادي - محمد بن أحمد بن محمد ابن عبد الله ابن عباد الهروي	٥٠

أصحاب الوجوه	٤٠٥	القاضي ابن كج - يوسف بن أحمد بن يوسف ابن كج الدينوري	٥١
شيخ العراقيين حافظ المذهب وإمامه	٤٠٦	أبو حامد الأسفرائيني - أحمد بن أحمد حافظ طريقة العراق	٥٢
وله وجوه	٤٠٣	الحلبي - أبو عبد الله الجرجاني الحسين بن الحسن المعروف بالحلي	٥٣
من أصحاب الوجوه	٤٥٠	أبو الحسن الماوردي - علي بن محمد بن حبيب الإمام الجليل حافظ للمذهب	٥٤
	٤٢٥	أبو علي البنديجي - الحسن بن عبد الله من أصحاب الشيخ جامد الأسفرائيني	٥٥
	٤٤٨	ابن الصباغ - محمد بن عبد الواحد المعروف بابن الصباغ أبو صاحب الشامل	٥٦
أول من جمع طريقتي العراق وخراسان	٤٣٦	أبو علي السنجي - الإمام الجليل الحسين ابن شعيب بن محمد السنجي	٥٧
أحد أئمة الدنيا	٤٤٤	ناصر المروزي - ناصر بن الحسين بن محمد ابن علي الشريف العمري، أبو الفتح القرشي	٥٨
	٤٥٠	أحمد الروياني - الإمام الكبير أبو العباس أحمد بن محمد بن أحمد الروياني، جد صاحب البحر	٥٩
شيخ طريقة الخراسان، الإمام الزاهد أحد أئمة الدنيا، يعرف بالقفال الصغير المروزي	٤١٧	القفال المروزي - عبد الله بن أحمد بن عبد الله	٦٠
من أصحاب الوجوه	٤٦١	الفوراني - عبد الرحمن بن محمد أحمد بن فوران الفوراني - الإمام الكبير، إمام حافظ للمذهب	٦١
	٤٦٢	القاضي الحسين - الحسين بن محمد بن أحمد، أبو علي القاضي الإمام الجليل	٦٢

الفقه والأصول والتفسير والأدب	٤٣٨	أبو محمد الجويني والد إمام الحرمين - عبد الله ابن يوسف بن عبد الله بن يوسف بن محمد	٦٣
	٤٥٨	الحافظ البيهقي - أبو بكر أحمد بن الحسين ابن علي النيسابوري	٦٤
أحد أئمة المذهب	٤٥٠	القاضي أبو الطيب الطبري - طاهر بن عبد الله ابن طاهر بن عمر الإمام الجليل	٦٥
	٤٦٣	أبو بكر الخطيب - أبو بكر أحمد بن علي ابن ثابت الخطيب الحافظ الكبير	٦٦
	٤٧٧	ابن الصباغ - عبد السيد بن محمد بن عبد الواحد صاحب الشامل والكامل	٦٧
	٤٧٨	المتولى - أبو سعد عبد الرحمن بن مأمون	٦٨
مدقق محقق	٤٧٨	أبو المعالي إمام الحرمين - ضياء الدين عبد الملك ابن الجويني النيسابوري شيخ الإسلام البحر المدقق المحقق	٦٩
	٤٧٦	أبو اسحاق الشيرازي ابراهيم بن علي بن يوسف الفيروزباذي الشيرازي الملقب بجمال الدين - صاحب المذهب	٧٠
	٤٧٥	أبو نصر البندنجي - محمد بن هبة بن محمد بن الحسين، الإمام الكبير، ويعرف بفتيحه الحرم	٧١
	٤٩٥	الحسين بن علي الطبري - إمام كبير صاحب العدة	٧٢
أحد أئمة المذهب	٥٠٢	الرويانى - قاضي القضاة عبد الواحد بن اسماعيل أبو المحاسن، فخر الإسلام الرويانى، صاحب البحر	٧٣
أحد فحول العلماء ورؤوس الأئمة	٥٠٤	الكياء الهراسي هو عماد الدين أبو الحسن علي بن محمد الطبري	٧٤

	٥٠٥	الإمام الغزالي - الإمام الجليل أبو حامد محمد ابن محمد بن محمد بن أحمد الطوسي	٧٥
	٥٠٧	أبو بكر الشاشي المستظهري - محمد بن أحمد ابن الحسين بن عمر، الإمام الجليل الحافظ	٧٦
إمام الجليل فقيه محدث مفسر	٥١٦	الفراء البغوي - الحسين بن مسعود الفراء الملقب محي السنة	٧٧
فقيه محدث أديب	٥١٠	أبو بكر السمعاني - محمد بن أبي المظفر منصور السمعاني	٧٨
فقيه محدث مفسر	٥١٦	البغوي - أبو محمد الحسين بن مسعود بن محمد البغوي المعروف بابن الفراء المقلب بمحي السنة	٧٩
أستاذ المتأخرين	٥٤٨	محي الدين - أبو سعيد النيسابوري محمد بن يحيى ابن منصور الإمام المعظم	٨٠
	٥٨٠	والد الإمام الرافعي محمد بن عبد الكريم ابن الفضل بن الحسن بن الحسين القزويني، إمام فاضل	٨١
	٥٥٨	العمراني - أبو الحسين يحيى بن أبي الحسين بن سالم العمراني اليماني، صاحب البيان	٨٢
	٥٨٠	أبو القاسم ابن المسامر - علي بن الحسن بن هبة الله الحافظ الشيخ الإمام ناصر السنة	٨٣
مفسر	٦٠٦	الإمام الرازي - محمد بن عبد القادر بن عمر بن الحسن بن الحسين التيمي البكري أبو عبد الله فخر الدين الرازي	٨٤

إمام في الفقه والتفسير والحديث، مجتهد.	٦٢٣	الإمام الرافعي أبو القاسم عبد الكريم القزوني شيخ الإسلام، صاحب الشرح الكبير المسمى بالعزير	٨٥
	٦٨٩	أبو العباس القليوبي - أحمد بن يحيى بن رضوان القليوبي	٨٦
إمام في الفقه والحديث	٦٤٣	أبو عمرو بن الصلاح - الشيخ تقي الدين عثمان ابن عبد الرحمن الكردي المعروف بابن الصلاح	٨٧
	٦٦٨	إبراهيم المرادي - إبراهيم بن عيسى المرادي الأندلسي ثم الدمشقي - من شيوخ الإمام النووي	٨٨
	٦٧٠	كمال الدين الأربلي - الشيخ كمال الدين أبو الفضائل سلار بن الحسين بن عمر الأربلي، شيخ الإمام النووي	٨٩
	٦٥٦	الحافظ المنزري - عبد العظيم بن عبد القوي ابن عبد الله ابو محمد المصري	٩٠
فقيه محدث	٦٢٠	ابن عساكر فخر الدين أبو منصور عبد الرحمن ابن محمد بن الحسين الدمشقي شيخ الشافعية بالشام	٩١
بلغ رتبة الاجتهاد (مجتهد مطلق)	٦٦٠	الشيخ عز الدين بن عبد السلام السلمي الدمشقي السلمي الملقب بسليمان العلماء بلغ رتبة الاجتهاد	٩٢
	٦٨١	ابن خلكان - أحمد بن محمد بن ابراهيم قاضي القضاة شمس الدين بن شهاب الدين، صاحب وفيات الأعيان	٩٣
أستاذ المتأخرين محرر المذهب، مجتهد فتوى	٦٧٦	الإمام النووي - محي الدين أبو زكريا يحيى بن شرف النووي، صاحب المجموع.	٩٤

فقيه عالم بالمذهب وعالم في الحديث	٦٨٧	الحافظ المزني - أبو عبد الرحمن الشيخ جمال الدين من تلاميذ النووي	٩٥
إمام في الفقه والأصول	٧١٠	ابن الرفعة - أبو يحيى الشيخ الإمام شيخ الإسلام أحمد بن محمد بن علي بن مرتفع المعروف بابن الرفعة	٩٦
مجتهد مطلق	٧٠٢	ابن دقيق العبيد - الشيخ محمد بن علي بن رجب القشيري أبو الفتح	٩٧
	٧٠٥	الحافظ الدمياطي - عبد المؤمن بن خلف بن أبي الحسن شرف الدين	٩٨
احد الحفاظ المفسرين	٧٥٦	تقي الدين السبكي أبو الحسن علي بن عبدالكافي الشيخ الإمام المحدث الحافظ شيخ الإسلام وحبر الأمة	٩٩
حافظ علامة محقق	٧٤٨	الحافظ الذهبي - محمد بن أحمد بن عثمان أبو عبد الله صاحب التاريخ الكبير	١٠٠
	٧٦٩	تاج الدين السبكي - أبو نصر عبد الوهاب بن علي قاضي القضاة. صاحب طبقات الشافعية الكبرى	١٠١
فقيه أصولي حافظ عالم بالعربية.	٧٧٢	الأسنوي - الشيخ أبو عبد الله/أبو محمد عبد الرحيم بن الحسن بن علي بن عمر الأسنوي جمال الدين	١٠٢
من كبار فقهاء الشافعية	٧٨٣/٧٨٠	الأذرعى - العلامة قطب الزمان أبو الوليد الشيخ شهاب الدين أحمد بن حمدان بن عبد الواحد	١٠٣
	٧٩٤	الزركشي - العلامة أبو الحسن الشيخ يدر الدين الزركشي	١٠٤
	٨٠٤	ابن الملتن صاحب تحفة المحتاج إلى أدلة المنهاج	١٠٥

٨٧٨	الإمام شرف الدين اسماعيل بن أبي بكر الشهير بابن المقرئ اليميني	١٠٦
٩٩١	الإمام جلال الدين عبد الرحمن بن أبي بكر السيوطي صاحب الأشباه والنظائر	١٠٧
٩٨٦	أبو بكر المشهور بالسيد البكري صاحب إعانة الطالبين	١٠٨
٩٧٤	الإمام شهاب الدين أبو العباس أحمد بن حجر الهيتمي صاحب تحفة المحتاج بشرح المنهاج	١٠٩
٩٢٦	أبو زكريا الأنصاري صاحب حاشية الشرقاوي على تحفة الطلاب	١١٠
٩٢٦	شيخ الإسلام أبو زكريا يحيى بن شرف الأنصاري صاحب فتح الوهاب بشرح منهج الطلاب	١١١
٩٧٧	الشيخ محمد بن أحمد الشرييني الخطيب صاحب مغني المحتاج شرح المنهاج	١١٢
١٢٢١	سليمان بن عمر بن محمد البجيرمي صاحب حاشية البجيرمي على المنهج المسماة التجريد لنفع العبيد (الإقناع)	١١٣
١٢٧٧	الشيخ إبراهيم بن محمد الباجوري صاحب حاشية الباجوري على بن قاسم	١١٤
١٠٠٤	العلامة شمس الدين بن شهاب الدين أحمد بن الرملي	١١٥
١٠٨٧	أبو الضياء نور الدين بن علي بن علي الشبراملسي صاحب الحاشية على المنهاج للنووي	١١٦

## RUJUKAN

1. Al-Majmu' Lil Imam Al-Nawawi
2. Manaqib Al-Syafi'e Lil Baihaqi
3. Hilyah Al-Aulia' Li Abi Nu'aim
4. Al-Bidayah Wal Nihayah Li Al-Hafiz, Ibnu Kathir
5. Al-Futuhah Al-Rabbaniyyah Li Ibni 'Alan Al-Makky
6. Al-Lubab fi Tahzibul Inab Li Ibni Al-Atsir Al-Jazary
7. Mughni Al-Muhtaj Li Al-Khatib Al-Sy'arbini
8. Tazkiratul Huffaz Li Al-Imam Al-Zahabi
9. Syazaratul Zahab Li Ibni Al-Hambali
10. Adab Al-Syafi'e wa Manaqibuhu Li Imam Abdir Rahman bin Abi Hatim Ar-Razi
11. Tahzib Al-Asma' Wal Lughaat Li Abi Zakaria Muhyiddin bin Syaraf An-Nawawi
12. Tabaqaat As-Syafi'iah Al-Kubra Li As-Subki.
13. Tawalli At-Tahsis Li Ma'ali Muhammad bin Idris Li Al-Hafiz Ibni Hajar Al-'Asqalani.
14. Al-Imam As-Syafi'e Fi Mazhabaihi Al-Qadim Wal-Zadid Li Dr. Ahmad Nahrawi Abdus Salam
15. Sirah Imam As-Syafi'e Oleh Dr. Wan Abdul Qadir bin Wan Ahmad
16. Usul Imam As-Syafi'e Fi Al-'Aqidah Li Dr. Abdullah Numsuk.
17. Imam As-Syafi'e Oleh Mustafa Suhaimi
18. Lain-Lain Rujukan.



MAAHAD AZ-ZEIN AL-MAKKI AL-'ALI  
LITAFAGQUH FIDDIN



Terbitan: **SNTV Media "Aakhiratkan Dunia"**

Pembelian & pertanyaan tentang kitab-kitab karangan Syaikhuna,  
juga sumbangan infak boleh disalurkan ke akaun  
CIMB Islamik – **SNTV Media** – 8602 8294 13  
Tel. Ariff 013-294 7805